

# *KUTANI YESU U TILE A FIKA A VITANA*



Mukwetsimi Yohana, kavanyisa ka vu11, ku sungula hi ndzimana ya vu18, ndzi navela ku hlaya.

*Sweswi Betania a ri ekusuhi na Yerusalem, kwalomu ka mpfhuka wa tistadia ta khume na nthlanu:*

*Kutani Vayuda lavo tala a va tile eka Marta na Mariya, ku ta va chavelela hikokwalaho ka makwavo wa vona.*

*Kutani Marta, kuteloko a twile leswaku Yesu wa ta, a ya hlangana na yena: kambe Mariya a tshamisa endlwini.*

*Kutani Marta a ku ka Yesu, Hosi, loko ingi a wu ri kona, ingi makwerhu wa mina a nga fanga.*

*Kambe ndza swi tiva, leswaku hambi ku ri sweswi, hinkwaswo leswi u nga ta swi kombela... Xikwembu, Xikwembu xi ta ku nyika swona.*

*Yesu a ku ka yena, Makwenu wa wena u ta tlhela a pfuka nakambe.*

*Marta a ku ka yena, Ndza swi tiva leswaku u ta tlhela a pfuka nakambe eku pfukeni ka vafi hi siku ro hetelela.*

*Yesu a ku ka yena, Hi mina ku pfuka, na... vutomi: loyi a pfumelaka eka mina, hambi a file, u ta tlhela a hany:*

*Kutani un'wana na un'wana loyi a hanyaka a va a pfumela eka mina a nga ka a nga fi. Xana wa swi pfumela leswi?*

*A ku ka yena, Ina, Hosi: ndza pfumela leswaku hi wena Kreste, N'wana wa Xikwembu, loyi a faneleke ku ta emisaveni. (Nakona mi langutisa sweswo!)*

*Kuteloko a vurile sweswo, a famba hi ndlela ya yena, kutani a ya vitana Mariya Makwavo exihundleni, a ku, Mufundhisi u tile, naswona wa ku vitana.*

<sup>2</sup> A hi khongeleni. Tatana wa le Matilweni, tiyisisa Marito yalawa etimbilwini ta hina, vusiku lebyi, tanahi leswi hi yimeleke Wena sweswi. Rito ra Wena, nandza wa Wena, na tsalwa, hinkwaswo swi tinyiketela eka Wena, hi Vito ra Yesu Kreste. Amen.

Mi nga tshama ehansi.

<sup>3</sup> Xikongomelo xa ku va ndzi ri lahawani i ku ringeta ku pfuna vanhu va Xikwembu. Ku nga ri ngopfu-ngopfu tanahi ku khongela, na ku tlhandleka mavoko ehenhla ka vavabyi, kambe leswaku va ta lemuka Yesu Kreste exikarhi ka hina, N'wana wa Xikwembu exikarhi ka hina. Hi le ku vulavuleni vusiku lebyi hi dyondzo leyi: *Kutani Yesu U Tile A Fika A Vitana*.

<sup>4</sup> Sweswi eka nkarhi lowu hi vulavulaka hi wona, a ku ri nkarhi wo vava swinene. Loko mi kale mi hlaya xitori eka vutomi bya Hosi ya hina, hi kuma leswaku A yi ri Munghana lonkulu wa mufana loyi, Lazaro. A yi ri tano... Endzhaku ka ku famba ka Yosefa, kumbe, a Yi sukile kutani yi ya tshama na Marta, Mariya, na Lazaro. Nakona a va ri vanghana lavakulu. A va ri na... A yi ri tanahi mufundhisi eka vona, e—e Munghana wa xiviri. Kutani va Yi endlerile swilo swintsongo swo ambala, khancu wo ambala, ndza pfumela, va koxa tano, nakona a ri rhungiwile ri nga ri na nsomo. Kutani a va N'wi endlerile swilo, hikuva a va pfumela eka Yena. A ku ri vona—vona lava nga pfumela nakona va vonile sweswo. A va tshikile kerekere, na swin'wana, ku va va N'wi landzela. Nakona walowo a ku ri nchumu wukulukumba hi siku rero, lowu hambi ndziho wa kona a ku ta va rifu, ku—ku fambela ekule na yona.

<sup>5</sup> Kambe, Yesu, Nakulorhi loyi a ri karhi a rhendzeleka hinkwako loko va koxa, a ri karhi a tlthatlamula tikereke ta vona, na ku vula swilo swo biha hi murrista wa vona, na—na swin'wana, U va—U va onherile swinene, loko va ehleketa. Kutani—kutani hambi ku ri ku hlambanya Yena a ku ta va ku ri ku—ku hlongoriwa etisinagogweni. Kutani loko u ri ehandle ka kerekere, a va—a va ehleketa leswaku a wuri ha va—ha va nkateko eka ku kutsuriwa. Loko ku ri ku a wu nga weli eka yin'wana ya mimpambukwa ya vona, kukotisa Vafarisi, Vasaduki, kumbe swin'wana, a ku ri ha va ku kutsuriwa loko u ri ehandle ka sweswo. Nakona loko ku ri a va ri na mfanelo, swilotlela, a va ta ku hlongola loko va swi lava. Yalawa a ku ri mavulavulele ya vona vinyi. A swi hlamarisi ku va Yesu a te, "N'wina, hi mindhavuko ya n'wina, mi endlile Rito ra Xikwembu leswaku ri nga ha vi na ntikelolo." Wa vona?

<sup>6</sup> Kutani sweswi swi engetile nakambe, hikuva hinkwerhu ha swi tiva leswaku matimu ya vuyelela nkarhi na nkarhi. Nakona swa—swa vava ku vula ku swi vula, kambe swi profetiwile ku va swi ta tlhela swi vuyelela, nakona ya swi endlile nakambe.

Hi kuma leswaku Yesu a nga tekiwi kahle ngopfu.

<sup>7</sup> Minkarhi yo tala, vanhu va lava ku avanyisa munhu loyi a nga pfumelelaniki na vona. A hi fanelanga ku endla sweswo. Hi nga ha kanetana hi xihina, kambe hi tama hi ri vanghana. Ndzi nga ka ndzi nga kanetani na munhu, naswona ndzi tama ndza ha n'wi rhandza na ku n'wi khongeleta, na ku n'wi kaneta ehe... na yena ehenhleni ka mhaka ya Matsalwa, kutani hikokwalaho

ka ku pfuleka ka vutivi byo antswa, kutani ndzi nga ka ndzi nga n'wi byeli nchumu. Ndzi tshamela ku lava ku kanetana na yena, hi vunghana, hikuva ndza n'wi rhandza, nakona hakunene a ndzi—ndzi lavi leswaku a lahleka. Kutani u fanele ku endla nchumu lowu fanaka eka mina; a hi lavi ku lahleka. Nakona hi fanele ku veka mianakanyo ya hina ehenhla ka leswi Rito ri swi vulaka. Rito a ri ve Ntiyiso. Ku nga ri dyondzo ya kereke ya hina kumbe leswi mianakanyo ya hina, kambe leswi A swi vulaka; ku nga ri vutokoti bya le xihundleni, ntsena leswi Rito ri swi vulaka.

<sup>8</sup> Vusiku byin'wana, ndzi endlile nchumu wun'wana nakona a wu tikomba wu ri xisandzu hakanyingi, ndzi ehleketa leswaku a ku ri xifhlulo xa vuministara emixweni wun'wana. Ndzi vekile Yesu eku tengeni. Ndzi te, "Tanihi laha va nga endla hakona, va ha swi endla tano na namuntlha." Kumbexani a swi ta va kahle loko a ndzo swi engeta nakambe ntsena xinkadyana, loko hi ri na nkarhi. Sweswi, ndzi teri, namuntlha hi kuma leswaku . . .

<sup>9</sup> Eka rhifomexini ya Luther, yena, hi nkarhi wa sweswo, u urile leswaku lavo lulama va ta hanya hi ripfumelo. "Munhu loyi a pfumelaka, yena, hi yena loyi a nga na Rona." Kambe hi kumile leswaku vo tala va vona a va vula leswaku va pfumela, nakona a va nga ri na Rona.

<sup>10</sup> Hi masiku ya—ya John Wesley, loko va ta va va kumile nkateko wa vumbirhi, va wu vitanile, ku basisiwa, ku basisiwa loku ku nga helela, va famble va tsakile va ri karhi va huwelela. "Hinkwavo a va huwelela, a va ri na Rona." Kambe va kumile leswaku a va nga ri na Rona. Vunyingi bya vona va huwelerile, nakona a va nga ri na Rona.

<sup>11</sup> Hi masiku ya Pentekosta, va te, "Sweswi ku tlheriseriwa ka tinyiko ku fikile, nkhuvulo wa Moya. Loyi a vulavulaka hi tindzimi, u na Rona." Hi kuma leswaku vo tala a va vulavula hi tindzimi, nakona a va nga ri na Rona.

<sup>12</sup> Swingaleswi va ri, "Kunene, muhandzu wa Moya, sweswo hi leswi Ri nga swona." Oho, ee, ku nga ri muhandzu wa Moya. Sayense ya Vukreste yi na leswaku, laha hi ku nonoha . . . Rirhandzu i muhandzu wa Moya. Kutani, nakona va na rirhandzu ro tala ku tlula un'wana na un'wana, nakona va ala Vukwembu bya Yesu Kreste; ntsena va N'wi vitana muprofeta, ntsena munhu wa ntolovel. Wa vona? Swingaleswi sweswo a swi swi endli.

<sup>13</sup> Ndzi pfumeleleni ndzi vutisa sweswo xinkadyananyana. A hi yiseni Yesu eku tengeni. Nakona Xikwembu xi ndzi rivalela hikokwalaho ka xitatemende lexi, ku suka eka platifomo, kambe ndzi ta hatlana na Yena xinkadyananyana, ntsena ku mi tisa eRivonini. Wa vona?

<sup>14</sup> "Sweswi ndzi na n'wina vanhu lahwani eka vusiku lebyi; ndzi le ku vulavuleni na n'wina. Ndzi . . ." (A ndzi ri le ndzhaku eka siku rin'wana, loko Yesu wa Nazareta a ha ri kwala

misaveni.) "Ndzi tile eka n'wina, ku ta kanerisana na n'wina ku hatlana na nakulorhi loyi, Yesu wa Nazareta. Sweswi hinkwerhu ha swi tiva leswaku Xikwembu i rirhandzu. Bibele yi vula leswaku Xi tano. Swi lulamile, kutani rirhandzu, Moya i wa ku tiyisela, vunene, ku lehisa mbilu, ku olova, na swin'wana, na rirhandzu. Sweswi ndzi ri, ndzi lava ku mi vutisa swin'wana. Hi ta ya eka leswi—leswi hi swi tivaka, Mukreste.

<sup>15</sup> "Langutisani muprista wa n'wina wa mukhalabya. Kokwa-wa kokwa-wa kokwani wa yena a ri muprista. A fanele ku va a tswariwile eka rixaka leriya ra Valevhi, ku va a va muprista. Hi kuma leswaku, sweswi, a nga na vutomi bya vujaha kukotisa leswi hinkwenu ka n'wina mi nga va na byona. Xana u endla yini? Wa tinyikela yena hi yexe, u kwalahaya ku va a dyondza Rito, Rito ra Xikwembu. Wa ri hlaya, vusiku na nhlekanhi, vusiku na nhlekanhi, u fanele ku tiva letere rin'wana na rin'wana ra rona, rito rin'wana na rin'wana eka tsalwa-songa. U fanele ku ri tiva hi mbilu. U—u, kova swin'wana mayelana na rona leswi a faneleke ku swi tiva.

<sup>16</sup> "Kutani, handle ka sweswo, loko tatana wa wena na manana wa wena va tekana, i mani loyi a nga va hlanganisa tanihu nuna na nsati? Muprista wa wena wa mukhalabya wa vukwembu. Xana a ku ri mani loyi a nga ta eka tata wa wena loko a pfumala na ku va a kolota mali yo karhi epurasini ra yena, leri valombisi a vaya eku ri tekeni? Xana i mani loyi a nga yima na yena? Muprista wa wena lonene wa mukhalabya. Xana i mani loyi a nga yima na manana wa wena ekamareni lahaya loko a ri karhi a ku veleka? Muprista wa wena lonene wa mukhalabya. Xana i mani loyi a ku tshinelelaka loko u vabya na ku pfumala? Muprista wa wena lonene wa mukhalabya. Xana a ku ri mani loyi a nga ku katekisa na ku ku nyikela eka Xikwembu, na ku ku yimbisa hi siku ra vunhungu? Muprista wa wena lonene wa mukhalabya. Loko tatana wa wena na manana wa wena va ri ekusuhi na ku thalana, xana i mani loyi a nga va vuyelelanisa, a va hlanganisa kun'we? Muprista wa wena lonene wa mukhalabya. Loko ku ri na xiphigo kwala ndhawini ya le kusuhi, xana i mani loyi a xi lulamisaka? Muprista wa wena lonene wa mukhalabya. Hakunene.

<sup>17</sup> "Sweswi muprista lonene wa mukhalabya wa swi tiva leswaku Bibele yi vurile leswaku Xikwembu xi lava xinyimpfana ku xi endla xa mhamba. Vunyingi bya n'wina vavanuna mi van'wamabindzu, swingaleswi a mi fuwi tinyimpfu, hambiswiritano Xikwembu xi lava nyimpfu. Va endlile swivala kwalahaya, va xavisa tinyimpfu ta vona leswaku e—e van'wamabindzu va ta ya va ya ti xava, va nyikela mhamba ya mimoya ya vona, leyi Xikwembu xi yi lavaka.

<sup>18</sup> "Xana u endlile yini nakulorhi loyi lontsongo, loyi a vitaniwaka Yesu? Xana u huma kwihi? Ku vuriwa leswaku u tswariwile, hi ku tswala ka ntombhi. Hambi i mani a nga tshama

a twa hi miharihari yo tani? Ha swi tiva leswaku manana wa yena u n'wi kumile loko yena na Yosefa va nga se tswariwa, kumbe, yena na Yosefa va nga se tekana, yena a tswariwile. Sweswi hi kuma leswaku u ni—u ni vito ro biha, xo sungula.

<sup>19</sup> “Xana i khadi muni ra vuxirho leri a nga na rona? Loko ku ri ku a ri munhu wa vukhongeri, xana i ntlawi wihi lowu a nga wu joyina? Loko muprista wa wena a hlaya, a hlaya, a hlaya, a hlaya, ku va a tiva Rito rero; hi loyi a humelelaka, a ri karhi a hahlulela leswi a nga swi aka. Xana mi nga n'wi vitana ‘Xikwembu’ yaloye? Na swintsongo.

<sup>20</sup> “Sweswi, siku rin’wana, loko muprista wa wena a ta va a endlile ndhawu liya lahaya, e...na laha mi nga ta xava kona mhamba, xana nakulorhi lontsongo u endlile yini? Vunene? U bile, a lukelela tintambhu endhawini yin’we, hi ntsembyana na madzovo, kutani a langutisa vanhu, hi vukarhi; a rahatela matafula lawaya, kutani a va ba va huma kwalahaya. Kutani u vitana sweswo ku va swi ri muhandzu ya Moya, ku va langutisa, hi vukarhi? Nakona, langutisani, ku tsoma wanuna nkateko wa yena wa ku gandzela Yehovha! N’wamabindzu u lava ku N’wi gandzela; a nga fuwi swinyimpfana, nakona u yile kwalaha ku ya xi xava. Kutani u swi hundzuluxile, a va hlongola, a va humesela ehandle.”

<sup>21</sup> Xana i mani loyi a nga na muhandzu wa Moya lahaya? Ahaa. Wa vona? Hi sweswo. Wa vona, ku nga ri muhandzu wa Moya, ku nga ri ku vulavula hi tindzimi, ku nga ri ku huwelela.

<sup>22</sup> Mi ri, “Kutani, Makwerhu Branham, xana vumbhoni i yini? Xana vumbhoni i yini?” Ku kombisiwa ka Rito hi awara.

<sup>23</sup> A va ri na Bibele. A ri leswi Yehovha a nga vula leswaku swi ta humelela. A swi lavi ku tolokiwa. Swi tolokile kwalahaya. A va ri kona vaprista va n’wina, a swi ri kona hinkwaswo leswi a va ri na swona, na swilo leswin’wana hinkwaswo ntsena swi longoloxiwile kukotisa sweswo na hinkwaswo, kambe hambiswiritano va tsandzekile ku vona Rito. Nakona U endlile Rito rero ri hanya eka nguva yaleyo. Byebyo i vumbhoni bya nguva yaleyo.

<sup>24</sup> Luther a ri na vumbhoni bya nguva ya yena, Wesley bya nguva ya yena, Pentekosta bya nguva ya yona, kambe hi le ka nguva yin’wana. Swilo sweswo hinkwaswo swi kahle. Kambe kukotisa n’wana, u na rintiho, tihlo, na nhompfu, kambe endzhaku ka nkarhi u fanele ku hundzuka munhu. U fanele ku hundzuka e—e n’wana loyi a nga vupfa; kutani a tswariwa, a va na moya-xiviri, miri, moyo, a kota ku famba-famba hinkwako.

<sup>25</sup> Sweswi hi kuma leswaku, leswi hinkwaswo, Yesu u swi tivisile, nakona vantsongonyana, ntsena lava Yena a nga va xixima ku ya eVuton’wini, va N’wi vonile. Ku nga ri mintshungu leyikulu; mintshungu ya Yena a yi nga ta pfuka yi vile tanahi mintshungu ya Khefasi. Hikokwalaho ka yini, Khefasi a nga

ha va a vitanerile tiko hinkwaro kun'we. Yesu u vitanerile vantsongonyana kun'we. A hi vo tala va nga N'wi tiva. Gidi hi ka Gidi, loko A ta emisaveni, U fambile hi misava, nakona a va kalanga va swi tiva leswaku A ri kona.

<sup>26</sup> Swi ta va tano nakambe! U ta tela lava va nga vitaneriwa eVuton'wini. Wa va tiva lava va nga vitaneriwa eVuton'wini. Nakona A nga ka . . . Intirho wa Yena ku vonana na sweswo.

<sup>27</sup> Sweswi ha xiyisisa leswaku va vuye va huma ekerekeni, kutani va N'wi pfumela. Hinkwaswo leswi Rito a ri ri karhi ri swi vula hi mayelana na Yena, A ri kwalahaya.

<sup>28</sup> Kutani siku rin'wana U sukerile kaya ra vona. Ndzi lava ku vulavula hi swilo swinharhu: Yesu u sukile; Rifu ri ta; kutani ntshembho hinkwako a wu fambile. Ndzi lava ku vulavula hi swilo leswiya swinharhu eka timinetse tintsongo.

<sup>29</sup> Yesu u fambile. Kuteloko A fambile, khombo ri nghena. Sweswi loko A ku sukela, kumbe kaya ra wena laha u tshamaka kona, khombo ri le ndleleni. Sathana u na nyangwa wo pfuleka loko Yesu a famba.

<sup>30</sup> U fambile, kute—kuteloko A ha ku famba, rifu ri nghena. Kutani loko Yesu a huma, rifu ra nghena. Ku hambana na Yena i rifu, swingaleswi rifu ri nghenile loko Yesu a humile.

<sup>31</sup> Kutani rifu ri namarhela Lazaro. Kutani Loyi a va pfumela eka yena na ku n'wi rhandza, va rhumerile eka Yena ku va a ta khongeleta Lazaro, hikuva a va N'wi vonile na ku swi tiva leswaku A tiva Xikwembu, leswaku, "Swin'wana na swin'wana, Xikwembu . . ." Marta u swi hlamsuserile endzhaku lahaya, "Swin'wana na swin'wana leswi Wena u swi byelaka Xikwembu sweswi, Xikwembu xi ta swi endla." U swi lemukile leswaku Yena na Xikwembu a va ri Un'we. A ri Rito ra awara, swingaleswi u swi lemukile sweswo. Nakona a swi tiva, leswaku loko o tshuka a hlanganile na Yena, kambe A fambile nakona a va nga ta N'wi kuma. Kutani va rhumerile eka Yena, nakona, ematshan'wini ya ku va a A ta, U yile emahlweni. Kutani va rhumerile nakambe, nakona, ematshan'wini ya ku va A ta, U yile emahlweni.

<sup>32</sup> Nkarhi wun'wana ha tivutisa leswaku hikokwalaho ka yini swilo leswi swi humelela, kambe xana Matsalwa a ma vuli leswaku, "Hinkwaswo swi tirhisana swin'we hi vunene eka lava va rhandzaka Xikwembu"? Wa swi tiva leswi A swi endlaka. Loko A hwela, sweswo swi lulamile. Wa swi tiva leswi A swi endlaka. A ku ri na xikongomelo.

<sup>33</sup> Hi kuma leswaku U vurile, eka Mukwetsimi Yohana 5:19, "Ndzi vurisile, ndzi vurisile, ndzi ri ka n'wina, N'wana a nga ka a nga endli nchumu hi Yexe, kambe leswi A vonaka Tatana a ri karhi a swi endla."

<sup>34</sup> Tatana a N'wi byerile leswaku a ya ekule, naswona a va ekule masiku yo karhi. Endzhaku ka loko masiku ya hetisekile, kutani U vurile leswi A nga swi vula nkarhi luwa, leswaku, "Munghana wa hina Lazaro u etlele."

Kutani a ku, "Kunene, u endla kahle."

<sup>35</sup> A ku, "U file. Kutani Ndzi tsakile hikokwalaho ka n'wina leswi ingi a Ndzi nga ri kona." Hikuva, a va ri karhi va ringeta ku endla leswaku A ya eka yena, ku ya n'wi horisa kumbe ku vula leswi a swi fanele ku endliwa. Kambe A swi tiva leswi a swi fanele ku endliwa, swingaleswi U endlile leswiya A nga vekiwa xifumo ku swi endla: tshama ekule. Loko mo N'wi xiyisisa esirheni loko A vuya. U swi hlamsuserile sweswo loko A tlhelela endzhaku a ya kuma muti lowu.

<sup>36</sup> Ntsembho hinkwawo a wu fambile. Lazaro a file. Awara yin'wana na yin'wana, a va tshamela ro ehleketa, "A nga ha ta eka mbono. A nga ha ta eka mbono. A nga ha vuyela endzhaku." Eku heteleleni, u file, moyo wu n'wi sukela.

<sup>37</sup> Va humile, va ya n'wi tota, ku susa ngati emirini wa yena, va n'wi phutsela hi nceka, swipayisisi, va n'wi tota na ku n'wi lata esirheni, va tlhandleka ribye ehenhla ka sirha, leswi a swi ri ntolovelwa vona wa ku lahla hi masiku lawaya. Goji ehansi, ntsena kumbexani eribyeni, kutani va tlhandleka ribye ehenhla ka rona, walowo a ku ri ntolovelwa vona.

<sup>38</sup> Siku ro rhanga ri hundzile, siku ra vumbirhi ri hundza, siku ra vunharhu ri hundza, siku ra vumune ri hundza, munhu a sungurile ku bola esirheni. Nhompfu ya yena kumbexana a yi wele endzeni. Sweswo, ndzi ehleketa leswaku i nchumu wo sungula lowu wu welaka endzeni, i nhompfu. Nakona se a borile. Nyama ya yena—yena a yi tlhelerile entshurini, wa misava, kumbe ku tlhelela endzhaku. Moya-xiviri wa yena a wuri na mune wa masiku erendzwensi roya kun'wana, ekule na yena.

<sup>39</sup> Ntsembho hinkwawo wa ku va a tlhela a voniwa nakambe, eka vutomi lebyi, a wu herile. Kutani loko ntshembho hinkwawo wu herile... A va rindzerile, "Kumbexani loko A nga ta hi siku ro rhanga, siku ra vumbirhi!" Ee. Kutani a fa, nakona A nga tanga. Kutani ku haganeka ku nghena.

<sup>40</sup> Endzhaku ka nkarhi ku na munhu un'wana loyi a nga vaka a n'wi byerile leswaku, "Hosi yi le handle." Hiloko Marta a rhelela hi xitarata!

<sup>41</sup> Yesu u nghanile hi awara leyti ya munyama loko ntshembho hinkwawo wu herile. Kwalaha hilaha hi ntolovelwa A fikaka kona. Wa vona? U ta hi nkarhi wa munyama wo tlurisa, kutani Yesu a humelela eka mbono.

<sup>42</sup> Sweswi vonani, U tile a fika a vitana Marta. Vukona bya Yena byi tisile ntshembho lowuntshwa. Swi nga ri na mhaka

loko mufana a file, hambiswiritano Vukona bya Yena byi tisa ntshembho lowuntshwa.

<sup>43</sup> U nga va u tshamile kwala vusiku lebyi, munghana wa mina, laha madokodela ya nga ku tsandzeka, hi mfukuzani, ku karhatiwa hi mbilu. Kumbexani exitulwini, u lamarile, sayense hinkwayo yi vurile leswaku ku ha va ntshembho eka wena; vuandlalo bya khalisiyamu byi—byi endlile mafundzu emarhambyini ya wena—wena—wena, lero a wa ha swi koti ku ma petsa. Kumbe, ku nga ha va mbilu ya wena—wena yi onhakile, dokodela u vula leswaku u nga ha famba eka minete yihi na yihi. Oho, na mintlawa leyikulu ya vanhu lava nga na mfukuzani na TB, kumbexani ntshembho wo hetelela lowu mi nga na wona, nakona swi tikomba ingaku dokodela u mi arile. Hambiswiritano, ku va eka Vukona na ku lemuka Vukona bya Yesu Kreste, swi vuyisa ntshembho nakambe.

<sup>44</sup> Munhu un'wana a nga ku tivisa swona. Kumbexani a wu se tshama u swi twa, kambe pfumelela un'wana a ku, “Ndzi tiva laha ku nga na kereke, va pfumela eka Xikwembu nakona va khongeleta vavabyi,” hi xihatla (Sweswi, u lunghekerile ku fa. Wa vona?), ntshembho lowuntshwa wa humelela. Wu tshamela ku swi endla. Hi awara yaleyo ya munyama, hi ntoloveloo hiloko un'wana a vula swin'wana mayelana na swona, a ku byela hi mayelana na Yesu. Vukona bya Yena byi tisile ntshembho lowuntshwa.

<sup>45</sup> Ingaku wu nga endla leswi swi fanaka vusiku lebyi, tanahi laha wu nga swi endla vusiku lebyi nga hundza. Loko hi vona Rito leriya ri kombisiweke handle ka ku kanakana, leri nga vonakariswa, na ku khorwiswi *leswaku* Yesu loyi a nga hanya eka khume nkaye wa madzana ya malembe lawa ya nga hundza, loyi a nga fa eXihambanweni, a pfuka hi siku ra vunharhu, kutani a humelela eka vadyondzisiwa lavaya na ku va pfula matihlo, kutani a endla xitshembhiso lexi xa siku leri, u kona kwala vusiku lebyi exikarhi ka hina sweswi, swi boheka ku tisa ntshembho eka vanhu. Ntshembho lowuntshwa wa hatima.

<sup>46</sup> Kumbexani munhu un'wana a nga va a te, “Kereke yi omerile nkarhi wo leha. A hi vanga na mati yo tengä eka—eka—eka tin'hweti ti nga ri tingani. A hi vanga na mpfuxelelo. Swi tikomba ingaku un'wana na un'wana u yimile endhawini yin'we, kumbe nchumu wun'wana. Ntsena ho ya ekerekeni hi fika hi yimbeleta risimu, kutani—kutani hi twa mahungu ma nga ri mangani ivi hi tlhelela endzhaku.” Kambe hi xitshuketa, kutani, loko hi sungula ku oma, kutani Yesu a fika eka mbono, a hi phyuphyisa, a tisa swin'wana swintshwa eka hina. U tshama a ri kona ku va a endla sweswo. Ntshembho lowuntsha wu ta loko—loko Yesu a nghena. Vukona bya Yena byi tisa ntshembho lowuntsha.

<sup>47</sup> Wansati a swi tiva leswaku A ri Rito ra Xikwembu leri nga vonakarisiwa. A vonile nguva yaleyo. Kumbe, loko a nga yi vonanga, a ta tama a ha ri Orthodox. A tama a ha wela ekerekeni. Kambe a vonile Rito leriya ri nga tshembhisiwa. A vonile Rito leriya ri nga tshembhisiwa ri vonakarisiwa hi Yena nakona a swi tiva leswaku A ri Rito leriya hanyaka. Kutani loko a twile hi mayelana na swona, a nga ri na mhaka na leswaku i vangani lava va n'wi sandzaka, hi swihi swin'wana, u sukile a ya eka Yena ntsena tanahi laha a ta famba hakona. Wa bona? A swi tiva leswaku A ri Rito leriya ri nga vonakarisiwa.

<sup>48</sup> A swi kanakanisi leswaku hi leswi a nga tshama a swi hlaya swa xitori xa Eliya hi masiku ya yena. Sweswi, a ri Rito ra Xikwembu leri nga vonakarisiwa hi siku rero. A ri muprofeta, nakona Rito ra Hosi ri ta eka muprofeta. Kutani a ku ri na wansati kwalahaya loyi a ri na xi langi lexi a nyikiwile xona hi nkateko lowu muprofeta a n'wi katekiseke hi wona, nakona u vile na n'wana.

<sup>49</sup> Siku rin'wana, kwalomu ka awara ya khume n'we, a nga va a vile na sululwani. A ri le handle ensin'wini na tata wakwe, Bibele a yi vuli leswaku a ku ri swona, ku vula leswaku a ku ri sululwani, kambe u sungurile ku rila, "Nhloko ya mina! Nhloko ya mina!" kwalomu ka awara ya khume n'we esikwini. Nakona a ri na nandza, i tata wakwe a ri na yena, wo n'wi yisa ekaya. U n'wi latile emindzhumbhini ya mana wakwe kukondza ku va nhlekanhi, a ya a ri karhi a nyanya ku vabya, kutani a heteleta a fa.

<sup>50</sup> Kutani sweswi, ematshan'wini yo famba hi gome, e... vaakelani hinkwavo va tile va ri karhi va kalakala na ku ya emahlweni, kambe manana luya a tiya, n'wana wa yena a file, u n'wi yisile exilawini lexiya a nga xi endlela muprofeta, kutani a n'wi lata ehenhla ka mubedo wa yena, kukotisa *sweswo*. Kutani a ku eka nandza, "Ndzi lunghisele meyila, kutani u khandziya u nga yimi, nakona u nga yimi handle ka loko ndzi ku byela ku endla tano." Oho, mina! Hi *sweswo*!

<sup>51</sup> Hi ha va nkarhi wa ku kanetana na ku phikizana. Siku leriya ri hundzile. A hi yeni emahlweni. Hi fanele ku fika lahaya. Hi na xilaveko.

<sup>52</sup> Swingaleswi u te, "Yana emahlweni, naswona u nga hunguti ku khandziya ka wena handle ka loko ndzi ku lerisa ku endla tano." Kutani va fambile kukondza va fika eka Eliya.

<sup>53</sup> Eliya, ku va a ri wanuna wa Xikwembu, ku nga ri kukotisa Kreste; Kreste a tiva swilo hinkwaswo, hikuva A ri Xikwembu. Eliya a ri xiphemu xa Xikwembu. Yaloye a ku ri Kreste endzeni ka Eliya. Nakona rero a ku ri Hungu ra awara, hikuva Rito ra Hosi eka awara yaleyo a ri ri na muprofeta yaloye.

<sup>54</sup> Yesu a ri ku hetiseka ka vaprofeta lavaya hinkwavo, un'wana na un'wana wa bona ntsena a vonakarisiwile eka Yena. Hi

sweswo tsena. Ndlela hinkwayo ku sukela eka Yosefa, ku sukela eka makume nharhu wa swiphemu swa silivhere, hinkwako, u—u fanisile Kreste. Swi tano na hi Muxé!

<sup>55</sup> Davhida, a tshamile tanahi hosi leyi ariweke exigangeni, a ri karhi a humesa mihloti hikuva a ariwile. Nhungu wa madzana ya malembe endzhaku ka sweswo, N'wana Davhida u tshamile exigangeni. Walowo a wuri Moya wa Kreste eka Davhida lahaya. Kutani U... Mina! A ri havumbirhi Rimintsu na Swimin tswana swa Davhida. Swingaleswi U tshamile exigangeni, a ri karhi a humesa mihloti, tanahi Hosi leyi ariweke, "Yerusalem, Yerusalem, i kangani laha A ndzi ta va ndzi ku wungile, tanahi laha mbhaha wu nga swi endlelaka swikukwani swa wona." Xana a ku ri yini? A ku ri Kreste le ndzhaku lahaya.

<sup>56</sup> A ku ri Kreste loyi a rila loko Davhida a tsala risimu, "Xikwembu Xanga, xana U Ndzi tshikele yini? Marhambu ya Mina hinkwawo, ya Ndzi sondzolota. Va tlhavile milenge ya Mina na mavoko ya Mina. Va avelanile tinguvu ta Mina. Va hlahluba vuholotwani hi tinguvu ta Mina." Yaloye a ku ri Kreste a vulavulaka endzeni ka Davhida. Hi swona sweswo. A ri ku vonakarisiwa ka Rito. Kreste a tela ku fikelerisa swilo leswi a swi vuriwile hi vaprofeta, hikuva Rito a ri ri na vaprofeta.

<sup>57</sup> U virile sweswo eka dyondzo ya vusiku bya tolo, leswaku U tela ku fikelerisa leswi vaprofeta va nga swi vula mayelana na Yena, hikuva a va ri na Rito. Naswona Eliya a ri muprofeta wa Xikwembu, Rito ra siku rero.

<sup>58</sup> Swingaleswi wansati wa Xunem u tshamile na muprofeta kukondza a fika a ta vonakarisa matimba ya Xikwembu, ivi a pavala ehenhla ka n'wana, kutani n'wana a vuyela evuton'wini.

<sup>59</sup> Sweswi Marta a nga va a lemukile leswi, hambileswi a ri karhi a chivirika a khathalela yindlu, ku hlantswa swibye, na swin'wana. Kambe lahaya u kombisile muhlovo wa yena. U kombisile leswi a swi ri eka yena hi xiviri. U yile a ya N'wi teka xikan'we-kan'we. Loko ku ri ku Xikwembu a xi ri eka Eliya, Xikwembu a xi boheka ku va eka Kreste, hikuva A khorwisile leswaku A ri Munhu yaloye. Amen. Ndza swi rhandza sweswo, ku tiyimisela kwaloko! U ya eka Yena. A fanele ku N'wi kuma. Kutani u kuma kwalahaya, loko a fika eka Yena—eka Yena; sweswi tsundzukani, a swi tiva leswaku A nga cincanga, leswaku Xikwembu a xi kali xi cinca nonganoko wa Xona. Loko ku ri ku a Xi ri eka Eliya nakona a kota ku pfuxa vafi, a Xi ri eka Kreste nakona a ta kota ku pfuxa vafi, hambileswi A nga swi endlanga, hikuva i Xikwembu xin'we.

<sup>60</sup> Naswona A nga se cinca! Ntsena ku va Xikwembu swonghasi vusiku lebyi tanahi laha A nga tshama a va ha kona. Hi la fanaka tolo, namuntlha, na hi masiku. A nga cinci.

<sup>61</sup> Nakona A swi tiva leswaku wansati wa swi tiva leswaku swi le ndzeni ka Yena. Vonani, ntsena eka timinetse tintsongo swi swi khorwisile, loko wansati a vula swin'wana eka Yena mayelana na makwavo wa yena, kutani u te, "Hosi, ndza—ndza pfumela leswaku U swona."

<sup>62</sup> Kutani Yena a ku, "Hi mina ku Pfuka na Vutomi. Hambiloko a file, u ta tlhela a hanya. Kutani un'wana na un'wana loyi a hanyaka a va a pfumela eka Mina a nga ka a nga fi. HI MINA." Yaloye i HI MINA loyi a ri eka xihihlaha lexi pfurhaka, na Muxé. "Hi mina ku Pfuka. Hi Mina Vutomi. A ndzi ri Khumbi. Ndza ha ri Yena. Hi mina ku Pfuka na Vutomi. Loyi a pfumelaka eka Mina, hambiloko a file, u ta tlhela a hanya. Un'wana na un'wana loyi a hanyaka a va a pfumela eka Mina, a nga ka a nga fi." Endzhaku ka xitiyisekiso lexikulu lexi wansati a nga va na xona, leswaku A ri Rito leri nga tshembhisiwa; loko A ta vula, ku va a ri Muprofeta, A nga ta hemba; hikokwalaho Yena, loko A te, "Ndzi yena loyi NDZI NGA YENA. Hi mina Yena loyi a nga ku Pfuka na Vutomi."

<sup>63</sup> Wansati a ku, "Ndza pfumela leswaku U Yena, N'wana wa Xikwembu loyi a faneleke ku ta emisaveni. Hambileswi makwerhu a nga fa, a etlerile kwalahaya sirheni, u...miri wa yena wu le ku boleni sweswi; kambe hambi ku ri sweswi, swin'wana na swin'wana leswi U swi vulaka, swi ta humelela." Hi swona!

<sup>64</sup> Hinkwaswo leswi a swi lava a ku ri ku N'wi twa a swi vula! Amen. Oho, Marta, xana hi le kwihi vusiku lebyi? "Ntsena vula Rito; nandza wa mina u ta hanya!" Ntsena ku N'wi twa a swi vula! Va nga ha va va tile va ta n'wi byela leswaku U swi vurile, kambe hi Loyer a ri kona hi Yexe. O Xikwembu, pfula matihlo lawa ya pfariweke, leswaku ya ta kota ku vona! Loko Yena, hi Vukona bya Yena, a vulavula Rito, nkarhi hinkwawo ra vonakarisiwa.

<sup>65</sup> Wansati u te, "Swin'wana na swin'wana leswi U swi kombelaka eka Xikwembu, Xikwembu xi ta Ku nyika swona. Ntsena ndzi pfumeleli ndzi swi twa!" A lava leswaku Yena a vula Rito. Sweswo hi leswi a lava ku swi twa. Ntsena ku kuma Rito, sweswo hi leswi a swi lava, a ku ri ku N'wi twa a vula leswaku U ta swi endla.

<sup>66</sup> Nakona A ta va a swi endlile hi nkarhi walowo, kambe, ma swi vona, hi xivono lexi Tatana a nga N'wi komba, A fanele ku va a yimile esirheni. Oho, mina! Khomani ripfumelo ra n'wina! Xikwembu xi le ku tirheni ka hinkwaswo hi ku lulama. Swi ta lulama. Ntsena u yimile kukondza a fika esirheni.

<sup>67</sup> Xiyisisani, ntsena a ta N'wi endla ku va a swi vula, hambiloko a ha ku... Ntshembho hinkwawo wu herile, swin'wana na swin'wana hinkwaswo. A file, a ri karhi a bola

esirheni, kambe ku N'wi twa a swi vula, hi leswi wansati a swi lava.

<sup>68</sup> Sweswi loko A ku, "Hi mina ku Pfuka na Vutomi," wansati u swi pfumerile. U swi pfumerile. Sweswi xiysisani, sweswi a fanele ku pfumela eka leswi swi nga kotekiki, loko a N'wi twile a ku, "Hi mina ku Pfuka na Vutomi. Hambiloko a file, u ta tlhela a hanya, kutani un'wana na un'wana loyi a hanyakaka a va a pfumela eka Mina a nga ka a nga fi." A ku, "Xana wa swi pfumela leswi?"

<sup>69</sup> Kutani wansati a ku, "Ina, Hosi, ndza swi pfumela. Ndza pfumela leswaku hi Wena N'wana wa Xikwembu loyi a faneleke ku ta emisaveni." Ndza swi rhandza sweswo. Ndza swi rhandza sweswo.

<sup>70</sup> Ndzi—ndzi tshama ndzi swi vula leswi. Swi nga ha yima nakambe namuntla sweswi. A ndzi ri karhi ndzi vulavula na wansati ku nga ri khale ngopfu, a ku ri kereke yo karhi leyi ndzi nga yi vula nkarhinyana lowu nga hundza, leyi yi nga pfumeriki leswaku A ri Xikwembu, Vukwembu bya Yena; O va ntsena muprofeta, munhu wa ntoloveloo.

<sup>71</sup> A ri sweswo, hi ntiyiso. A ri sweswo, ku hlanganisiwa na Xikwembu. Wa vona, A ri ku vonakarisiwa. Yesu i miri, Jaha, Munhu; Xikwembu a ku ri leswi a swi tshame endzeni ka Yena. Xikwembu a xi ri endzeni ka Yena. A ri Xikwembu-munhu. A ri Munhu, hambiswiritano A ri Xikwembu lexi xi vonakarisiweke enyameni. Loko hi vona Yesu, hi vona Xikwembu. Sweswo hi leswi A nga swi vula, "Loko mi vona Tatana . . . ku vona Mina, mi vona Tatana." Hikuva, A ri xivonivoni, hikuva A ri Rito, amen, leri a ri ri eku sunguleni. Amen.

<sup>72</sup> U vurile vaprofeta, "xikwembu." Xana ma swi tiva sweswo? U te, "Mi va vula 'xikwembu' lava Rito xa Xikwembu ri taka eka vona. Xana mi nga Ndzi sola ha yini loko Ndzi ku, 'Ndzi N'wana wa Xikwembu'?"

<sup>73</sup> Hikuva, Rito leri fanaka ri vurile leswaku U ta va kona, nakona hi leriya Rito ri nga vonakarisiwa nakambe. Nakona hambiswiritano a va nga ta ri pfumela.

<sup>74</sup> Wansati loyi a ku ka mina, "Ndzi nga swi khorwisa eka wena." A ku, "Ndzi nga tsakela ku ku twa u chumayela, kambe ku na nchumu wun'we lowu u wu endlaka ku tlula mpimo."

"Kunene, i yini sweswo?"

A ku, "U tibuma-bumela ngopfu hi Yesu."

<sup>75</sup> Ndzi ku, "Ndzi tshembha leswaku sweswo hi swona ntsena leswi A nga na swona ku hatlana na mina loko A vuya." Kutani a ku . . . Ndzi ku, "Ndzi tshembha leswaku hi sweswo ntsena leswi A nga ta, xihoxo lexi A nga ta xi kuma eka mina." Ndzi ku, "Loko a ndzi ri na tindzimi ta khume ra magidi, a ndzi nga ta swi vula hi ku ringanelo, oho, mina, leswi A nga xiswona!"

A ku, "Kambe, wena, u N'wi endla Xikwembu."

<sup>76</sup> Ndzi ku, “A ri xona. Kumbe, loko ku ri ku A nga ri xona, A ri mukanganyisi lonkulu ku tlurisa loyi misava yi nga tshama yi va na yena.”

A ku, “A ri muprefeta.”

<sup>77</sup> Ndzi ku, “A ri Muprefeta, walowo i ntiyiso: Xikwembu-muprefeta, ku hetiseka ka Rito. Muprefeta ntsena a ri na Rito leri ri taka ka yena, sweswo hi leswi swi n’wi endlaka—swi n’wi endleke a va muprefeta. Kambe Yena a ri ku hetiseka ka Rito rero.”

<sup>78</sup> Kutani a ku, “Ndzi nga swi khorwisa eka wena.” A ku, “U N’wi endla Vukwembu.”

Ndzi ku, “A ri Vukwembu.”

Kutani a ku, “A nga ka a nga vi Vukwembu.”

Ndzi ku, “A . . . Kambe A ri yena.”

A ku, “U te u pfumela Bibebe.”

Ndzi ku, “Ndza yi pfumela.”

<sup>79</sup> A ku, “Ndzi ta swi khorwisa eka wena, hi Bibebe ya wena n’winyi, leswaku A nga ri Vukwembu.”

<sup>80</sup> Ndzi ku, “Swi endlili. Loko Bibebe yi vula tano, kutani ndzi ta swi pfumela, hikuva ndzi pfumela leswaku Rito ri lulamile.”

<sup>81</sup> A ku, “Endleleni yo ya esirheni ra Lazaro, wa swi tsundzuka sweswo eka Mukwetsimi Yohana 11?”

Ndzi ku, “Kunene ndza swi tsundzuka, manana.”

<sup>82</sup> A ku, “Kunene, sweswi, hi ku rhelela hi patu, U ririle. Bibebe yi te, ‘U bikurile.’”

Ndzi ku, “Hakunene, Bibebe yi vurile leswaku U bikurile.”

A ku, “Xana A nga va vukwembu njhani a tlhela a bikula?”

Ndzi ku, “A ri munhu.”

“Munhu na ku va wa Matimba?”

<sup>83</sup> Ndzi ku, “Ina, wansati. U tsandzeka ku vona. A ri e—e munhu loko a ri karhi a famba kwalahaya, a ri karhi a rila na lava a va rila, sweswo swi lulamile, ku rila na lava va rilaka. A ri Munhu. Kambe loko A vuyeterile wa Yena lowuntsongo, miri wo tsana ehenhla, kutani a ku, ‘Lazaro, huma,’ kutani munhu loyi a file mune wa masiku, a yima hi milenge ya yena. Sweswo swi tekile swo tlula munhu, xexo a xi ri Xikwembu endzeni ka Munhu.” I mani loyi a nga pfuxaka vafi, handle ka Xikwembu? Hi Yena ku Pfuka na Vutomi! Hi swona sweswo.

<sup>84</sup> Vusiku byebyo le lwandle, loko A ri kwalahaya, a karhele, a ettele le ndzhaku ka byatso, laha khume ra magidi ya madimona a ya hlambanyile leswaku ya ta N’wi nwerisa vusiku byebyo, nakona byatso lebyiya byintsongo bya khale a byi ri karhi byi phewa kukotisa xipfalo xa bodlhela kwale xidzedzeni xa

Iwandle. Madimona a ma ehleketa leswaku, "Hi N'wi kumile sweswi. U ettele; Hi ta mbombometa ntlawa hinkwawo." Oho, A ri Munhu, a karhele, kambe loko a ta pfuxiwa, U tlhandlekile nenge wa Yena ehenhla ka ntambhu, ivi a langutisa ehenhla kutani a ku, "Rhula, u yima," kutani mimoya na magandlati swi N'wi yingisa. Yaloye a tlula munhu.

<sup>85</sup> A ri Munhu loko A twa ndlala, u xikile hi le ntshaveni, a ri karhi a lava xiphemu xa xinkwa kumbe swin'wana swo dya, kumbe kuwa ku suka ensinyeni. Kambe loko A teka swikhkhani swa ntlhanu na tihlampfi timbirhi, kutani a phamela ntlhanu wa magidi, xexo a xi ri Xikwembu endzeni ka Munhu yaloye. Hi swona sweswo.

<sup>86</sup> Oho, munhu un'wana na un'wana loyi a nga tshama a hetelela eka leswi swi nga pfuniki nchumu a pfumela sweswo, vaphati hinkwavo lava a va pfumela sweswo. A swi hlamarisi ku va un'wana a tsarile:

Hi ku hanya U ndzi rhandzile; kutani hi ku fa,  
U ndzi ponisile;  
Hi ku lahliwa, U tekerile swidyoho swa mina  
ekule;  
Hi ku pfuka, U lulamisile mahala hi masiku;  
Eka rin'wana ra masiku U le ku teni, O siku ro  
kwetsima!

<sup>87</sup> Eddie Perronet, loyi tinsimu ta yena a ti nga xavisi. Siku rin'wana, a ri karhi a dedeleka ehansi ka nsusumeto wa Moya lowo Kwetsima, u vhunghile xitsalo, a tsala risimu ro khangula, loko a tsala:

Hinkwenu losani matimba ya Vito ra Yesu!  
Tintsumi a ti pavalali ehansi;  
Tisani harhi ya vuhosoi,  
N'wi ambexeni harhi ya ku va Hosi ya  
hinkwavo! (Haleluya!)

<sup>88</sup> Hakunene, sweswo hi leswi hi pfumelaka leswaku A ri xiswona. Ina, nkulukumba.

<sup>89</sup> Wansati a fanele ku pfumela eka leswi nga kotekiki sweswi, eka maehleketelele ya ximanguva lawa eka siku leriya. Swingaleswi xana mi nga va mi fanele ku pfumela eka leswi nga kotekiki, ku va mi vona Vutomi byintshwa, ku vona swin'wana swi ri karhi swi humeleta. Kambe loko ku ri ku U lemukile... Wansati u N'wi lemukile ku va A ri Rito, kutani leswi nga kotekiki swi nga humeleta, hikuva hi Yena Mutumbuluxi, nakona uta yima hi hinkwaswo leswi A nga swi vula.

<sup>90</sup> "Kutani swilo hinkwaswo swa koteka eka lava va nga ta pfumela." Rero i Rito ra Yena. Kambe leswi nga kotekiki swi vonakarisiwa loko Xikwembu xi tekiwa ku ya hi Rito ra Xona. Ina, nkulukumba. Loko Xikwembu xi tekiwa ku ya hi Rito ra Xona, leswi nga kotekiki swa—swa vonakarisiwa. Loko

Xikwembu xi ku swi ta va tano, kutani mi teka Rito rero kutani mi langutisa loko, leswi nga kotekiki swi humelela. Hakunene swi ta humelela.

<sup>91</sup> Kambe xiyisisani, hambi ku ri eka sweswo hinkwaswo, wansati u te, "Hambi ku ri sweswi, Hosi, swin'wana na swin'wana leswi U nga ta swi kombela eka Xikwembu, Xikwembu xi ta swi endla." Wansati a swi tiva leswaku ntsena a nga endla leswaku Rito rero ri huma eka Yena. Sweswo hi leswi a lava ku swi endla, a ku ri ku kuma Rito rero. Ina, a ku ri awara ya munyama eka yena, nakona Yesu u tile a ta vitana. Oho, I nchumu muni lowu va nga wu vona, ku pfuxiwa!

A hi langutiseni eka swin'wana swa laha tiawara ta munyama ti nga ta.

<sup>92</sup> A ku ri na wanuna nkarhi wun'wana, loyi a vitaniwa Yobo, un'wana wa vaprofeta va khale eBibeleni. A ri munhu wa kahle. A—a rhandzile Hosi, nakona a endlile hinkwaswo leswi a kota ku swi endla. Kutani Sathana u naverile ku n'wi kambisisa, swingaleswi u byerile Xikwembu siku rin'wana... Ina, Xikwembu xi ku eka yena, swa antswa, "U huma kwihi, Sathana?"

<sup>93</sup> Yena a ku, "Oho, a ndzi ri karhi ndzi ya hala-na-hala na ku ya ehenhla-na-le hansi emisaveni."

<sup>94</sup> Xi ku, "Xana u n'wi tekerile enhlokweni nandza wa Mina Yobo? A ku na loyi a fanaka na yena emisaveni. I munhu wo lulama."

<sup>95</sup> "Oho," a ku, "kunene, U n'wi nyikile hinkwaswo, u n'wi endlela hinkwaswo. Hakunene, i munhu wo lulama. Kambe ndzi pfumelele ndzi va na yena kan'we, ndzi ta cinca chuni. Ndzi ta n'wi endla a Ku rhukana, exikandzeni xa Wena."

<sup>96</sup> Xona xi ku, "U nga ka u nga swi koti." Walowo i ntshembho wa Xona eka mupfumeri. Hikokwalaho ka yini? A xi na makumu. Xi hilaha ku nga Heriki. Xi tiva makumu ku sukela eku sunguleni. A xi swi tiva leswaku Sathana a nga ta swi kota. Hikuva, hi Xona Rito, Xi tiva leswi Yobo a ta swi endla.

<sup>97</sup> Sweswi, tsundzukani, Yobo, u n'wi cherile marhumba, a dlaya vana va yena, a teka hinkwaswo leswi a ri na swona. Rihanyu ra yena a ri fambile. Hambi ku ri vachaveleri va yena va tile, nakona a va nga ta endla nchumu handle ka ku n'wi lumbeta hi ku va a ri mudyohi wa le xihundleni. Kutani mukhalabya Yobo u fikile eka xiyimo lexi a nga tshikeleleka swonghasi.

<sup>98</sup> Mi fanele ku fika ehansi ka ntshikelelo, ku sungula. Mi fanele ku fika eka nkarhi laha mi nga emakumu ka patu.

<sup>99</sup> Yobo a fikile emakumu ka patu, loko a ku, "A ku rhukaniwe siku leri ndzi nga velekiwa ha rona. Dyambu ri nga kali ri voninga, nakona n'weti wu nga kali wu voninga ni vusiku, vito ri nga kali ri vitaniwa." Kutani eka ntshikelelo walowo, kutani

Yesu u vuye a fika. U langutile ehansi, kutani a ku, “Ndza swi vona, kukotisa munhu, xiluva xa fa, kutani xi tlhela xi pfuka hi ximun’wana. Loko nsinya wu wela ehansi, wu tlhela wu pfuka nakambe hi ku twa risema ra mati.” U vonile vutomi hinkwabyo bya swimilana byi tlhela byi hanya nakambe, kambe a ku, “Munhu loko a file, u nyiketa moyo wa yena, u kwihi xana?” A swi tiva leswaku a ri mukhalabya. A ku, “Vana va yena va ta ku ta n’wi rila, kutani a nga va twi. Oho, loko ingi U ndzi fihlile esirheni u ndzi pfalela endhawini ya xihundla, kukondza vukarhi bya Wena byi hundza. Ndzi vekeli nkarhi na ku ndzi pimela nkarhi. Hi yile . . .” Nakona a ya emahlweni kukotisa sweswo, a ri karhi a vulavula. A ri emakumu, ka ku tshikeleka ka yena, “Xana ku nga humelela yini? Matluka ya hanya, ya vuyela eminsinyeni, swiluva swi vuyela endzhaku nakambe, leswin’wana hinkwaswo swa hluka, kambe munhu wa fa kutani a nyiketa moyo wa yena!” A ri ehansi ka ntshikelelo. A nga swi tivi leswi a swi ta n’wi humelela, naswona yena eka vukhale lebyiya.

<sup>100</sup> Loko a hetile, Yesu u fikile kwalahaya. Xikwembu xi kongomisile nhloko ya yena ku kongomana na tilo, ivi a vona Yesu a ri karhi a vuya hi masiku layo hetelela.

<sup>101</sup> Awara yo dzwihala ku tlurisa loko nsati wa yena a ku, “Rhukana Xikwembu kutani u fa kunene,” hambiswiritano u te, “Wansati, u vulavula kukotisa xihunguki. Hosi a yi nyikile, kutani Hosi yi tekile, a ku katekisiwe Vito ra Hosi.” Na yena nsati wa yena u n’wi arile. Kereke ya yena yi n’wi arile. Un’wana na un’wana u n’wi arile.

<sup>102</sup> Hi awara ya munyama, laha a nga swi tivi leswaku u ta ya kwipihi ku suka lahaya, Yesu a fika kwalahaya. Kutani a kalakala, “Ndza swi tiva leswaku Mukutsuri wa mina wa hanya, nakona hi masiku yo hetelela U ta yima ehenhla ka misava. Kutani hambiloko swivungu swa nhlonge swi onha miri lowu, ndzi ta vona Xikwembu ndzi ri enyameni ya mina, Lexi ndzi nga ta xi vona hi ndzexe.” Hi awara ya yena yo dzwihala ku tlurisa, kutani Yesu a fika kwalahaya. Ina, nkulukumba.

<sup>103</sup> Muxe, eka Muxe, awara yo dzwihala ku tlurisa yi n’wi fikerile e Israel. A ri kwale ntileni wa ntirho; a hlangana na Xikwembu exihlahleni, kutani xi ku, “NDZI YENA LOYI NDZI NGA YENA.” U rhelerile ehansi a ya lwisana na tinxaka hinkwato ta vuencyeti bya Yani na Yambri, lava a va ringeta ku encenyeta ntirho wa yena. Leswi hinkwaswo, a yimile hi ntiyiso eka Xikwembu. Eku heteleleni u endlile leswaku Israel ri pfumela. Kutani hi loyi a humaka e Egupta, a ri karhi a tlhandlukela e-e tikweni ra xitshembhiso, laha Xikwembu xi nge te, “Mi ta Ndzi gandzela entshaveni leyi.” Rero a ku ri Rito ra Xikwembu. Muxe a swi tiva leswaku a fanele ku ya entshaveni yaleyo. Amen. Xikwembu a xi vule tano! A ku na Faro loyi a nga ta n’wi dlaya. A ku na javulosi loyi a nga ta n’wi dlaya. A ku na

nchumu lexi nga ta n'wi dlaya. U le ku teni entshaveni yaleyo. Amen! Haleluya! Ndzi titwa ndzi kateka. U ya entshaveni liya.

<sup>104</sup> Swingaleswi hi le ndleleni ya hina yo ya eVukwetsimelweni! A ku na nchumu lexi nga ta hi yimisa. Ee, nkulukumba. Xikwembu xi ya eku tiyisiseni ka Rito ra Xona. A ndzi na mhaka na leswaku ku humelela yini, Xi ya eku swi endleni, hambiswiritano. Ina.

<sup>105</sup> Endleleni ya yena, kwale ndleleni ya ntirho. Hi loyi kwala, a patsanisiweke exikarhi ka tintshava. Wa yingisela kutani a twa ku bonga endzhaku ka yena. Xana i yini? Tigolonyi ta Faro, hi magidi-gidi, ti ri eku teni; swi hlomile, na matlharhi na swilo, ku ta va tlumba na ku va kandziyela. Hi leriya Lwandle ro Tshwuka, ri n'wi tsemile. Xana u endlile yini? U fikile eku tshi- . . . U fikile ehansi ka ntshikelelo. Vanhu va ri karhi va kalakala hinkwavo, "Oho, hi le ndzeni ka swona sweswi. Faro u ta hi dlaya, matlharhi ma yena ma ta hundzisiwa endzeni ka hina. Vana va hina va ta fela kwala mananga."

Muxa a huwelela, "O Xikwembu!"

<sup>106</sup> Kutani Yesu a fika eka mbono. A ri Langavi ra Ndzilo. Hi swona sweswo. U xikerile ehansi kutani A lengalenga exikarhi ka vona na khombo. Amen. Hi yena Mufamba-xikarhi wa hina. Hi yena Muyima-xikarhi, amen, Muhamanganisi. Hi Luya a yimeke, a yimile kwalahaya; munyama eka Vaegipta, lava a va ri karhi va ta kuta ringeta ku endla swin'wana mayelana na swona. A ri Rivoni eka vona, ro famba hi rona. Kutani ni mixo loko moyo wu sungula ku hunga hi matimba, vusiku byebyo, kutani xana U endlile yini? U tile hi xivumbeko xa Langavi ra Ndzilo.

<sup>107</sup> Tsundzukani, Wa ha ri rona Langavi leriya ra Ndzilo. Ina, nkulukumba. Loko A ha ri kwala misaveni, Ü te, "Ndzi huma eka Xikwembu, kutani Ndzi ya eka Xikwembu."

<sup>108</sup> Kutani endzhaku ka rifu ra Yena, ku lahliwa, ku pfuka, na ku thandluka; Mukwetsimi Paul, endleleni ya yena yo ya eDamaska, u biwile hi Langavi leriya ra Ndzilo. Tsundzukani, a ri Muheveru. A ta va a nga swi vulanga leswi. . . U te, "Hosi, xana hi Wena mani?" Letere lerikulu H-o-s-i, Elohim. "Xana hi Wena mani loyi ndzi n'wi xanisaka?"

Yena a ku, "Hi mina Yesu."

<sup>109</sup> Amen! Haleluya! Hi yena lowo Rhanga na lowo Hetelela. Wa ha ri loyi a fanaka. "Ku nga ri kungani kutani misava a yi nga ha Ndzi voni, kambe n'wina mi ta Ndzi vona. Ndzi ta va na n'wina, na ku va endzeni ka n'wina." Langavi leri fanaka ra Ndzilo, Xikwembu lexi fanaka lexi endlaka nchumu lowu fanaka, hi xitshembhiso lexi fanaka, amen, ku vonakarisa Rito ra Xona. "Hi mina ku Pfuka na Vutomi. Hi mina Loyi a ri Kona, Loyi a ngi Kona, na Loyi a nga Ta ta." Ina, nkulukumba. Ina.

"Vatata wa hina va dyile mana emananga."

<sup>110</sup> Yena a ku, "Vona, hinkwavo ka vona, va file. Kambe, NDZI YENA LOYI ANGA YENA." Muxe . . . Exihlahleni lexi pfurhaka, luya a ku ri NDZI YENA. Wa ha ri NDZI YENA, ku nga ri Loyi a ri kona; NDZI YENA, nkarhi wa sweswi, minkarhi hinkwayo.

<sup>111</sup> Hi kuma leswaku lahwani Muxe u susumeteriwile eka khona leyi, kutani Kreste u xikerile ehansi. Sweswi, kutani Bibebe yi vurile sweswo, leswaku, "Muxe u ringanisile e—e xisandzu xa Kreste ku va xi ri rifuwo leri tlulaka xuma xa Egipta." Xisandzu xa Kreste! Kreste a ri Ntoto, Logos loyi a nga huma eka Xikwembu. Ntsumi, muhlayi un'wana na un'wana wa Bibebe wa swi tiva leswaku Ntsumi liya a ku ri Kreste. Kutani hi Liya a yi ri kwalahaya mananga, kutani Yi fikile eka mbono, hi xivumbeko lexi a Yi fanele ku vonakarisiwa eka xona. Ku kwetsima a kuve eka Xikwembu!

<sup>112</sup> Wa ta namuntlha hi xivumbeko, lexi Kreste loyi a fanaka, a vonakarisiweke eka xona.

<sup>113</sup> U va byerile leswaku U ta va humesa. A ri karhi a swi endla. Hiloko A ya ku ya yima hi Rito ra Yena, ku Ri kombisa. Kutani endzhaku ka loko A tile, kukotisa hilaha A nga swi endla hakona eka Marta, U vitanile. U te, "Muxe, hikokwalaho ka yini u Ndzi rilela? Vulavula na vanhu lava, leswaku miya emahlweni." Hi awara liya ya munyama, Lwandle ro Tshwuksa ri pfuleka ivi va tsemakanya, endleleni ya vona ku fikelerisa Rito ra Xikwembu. Ina, hi awara ya Muxe yo dzwihala ku tlurisa, kutani Yesu a fika kwalahaya. Hi na nkarhi sweswi . . . Kutani U vitanile Muxe.

<sup>114</sup> Hi lava ku kokela rinoko ra n'wina eka wanunanyana un'wana. Vito ra yena a ku ri Yairo. Ku na vo tala va vona emisaveni namuntlha. A ri mupfumeri wa le xihundleni. A rhanda Yesu. A tshame a twa hi mayelana na Yena. A N'wi pfumela. Kambe, ma swi vona, a ku ri khale a joyinile vandla. Ina. Ntsena u—u—u—u . . . A nga ta humela ehandle a ya tivula. A swi pfumela, kambe a nga ta tivula, swingaleswi a ku ri khale a joyinile lava nga pfumeriki. Kambe a swi pfumela hi xiviri.

<sup>115</sup> Ma swi tiva, loko munhu a fika eka xivumbeko xexo, nkarhi wun'wana Xikwembu xi n'wi yisa eka nkombiso. Ehansi ka ntshikelelo hilaha hi kombisaka mihlovo ya hina hi xiviri, leswi hi nga xiswona.

<sup>116</sup> Swingaleswi a ri kwalahaya, a ku ri khale a joyinile eka lava nga pfumeriki, nakona a ku ri khale a yile ku ya tsarisa vito ra yena ebukwini, na swin'wana. Nakona a ri muprista, swingaleswi ntsena a—a nga ta swi kota ku tivula, hikuva rero a ku ri thikithi ra yena ra swakudya. Swingaleswi, kambe a tama a ha pfumela eka Yesu.

<sup>117</sup> Siku rin'wana, xinhwanyetana xa yena xi khomiwile hi vuvabyi. Oho, mina. Yena, handle ka ku kanaka wanuna, loko a . . . kukotisa sweswo, a ta va a vitanile dokodela. Mutshunguri u tile, a vona n'wana. Ku hisa miri ka yena ku ya ku

nyanya. Endzhaku ka nkarhi u vuye a hisa ku tlula mpimo, na hinkwaswo, a hetelela a fika eka xiyimo xa rifu. Tata wakwe a ri ehansi ka ntshikelelo. A fanele ku endla swin'wana. Ntsena a—a nga swi tivi leswaku a nga endla yini. Sweswi a ehleketa, "Loko ntsena ndzo N'wi kuma, kwihi na kwihi laha A nga kona." Sweswi a nga kalanga a yima kukondza ku va vusiku, kukotisa hilaha Nikodema a nga endla hakona, ku va na vukonganisi bya le xihundleni. Nkarhi a wuri wo teka goza, nkarhi wo teka goza a wu fikile nakona a fanele ku teka goza.

<sup>118</sup> Kutani ndza ehleketa, boti, sesi, swa fana na sweswi. Nkarhi wu fikile wa ku teka goza. Nkarhi wu fikile wa ku pfumela kumbe ku ka mi nga pfumeli. Layini liya yo hambanyisa yi tela wanuna na wansati un'wana na un'wana. Yi ta eka n'wana un'wana na un'wana. Nkarhi wun'wana loko mi hundza layini yaleyo, ku na nchumu wun'we ntsena lowu nga sala, sweswo i ku avanyisa, loko mi hundza exikarhi ka ntsentselelo na ku avanyisa, loko mi hundza layini yaleyo.

<sup>119</sup> Tsundzukani, u khomiwile hi ntshikelelo. A nga swi tivi leswaku a nga endla yini. Hi lahaya a ku yimile vaprista va yena, tirabi hinkwato ti yimile etlhelo ka yena. Xinakulobye a xi ri na yena, hinkwavo a va ri kwalahaya, va langutisile xinhwenyetani xa yena loko xi fa. Dokodela a yimile ehandle, a khondlile mavoko ma yena, a ri karhi a rhurhumerisa mavoko ma yena, "Ndzi n'wi nyikile mirhi hinkwayo leyi ndzi yi tivaka, kambe hambiswritano . . ."

<sup>120</sup> Wa vona, a ku ri Yesu a tirhaka nkarhi hinkwawo. Yesu a endla leswi hi xikongomelo, ku humesela muhlovo wa nakulorhi lontsongo ehandle. Endzhaku ka nkarhi, onge ndza n'wi vona loko a ya teka xidlokonyana xa yena xa ntima ivi a xi ambala, a ambala xibajani xa yena xa vuprista.

"Xana u ya kwihi?"

<sup>121</sup> "Ndzi . . . Ndzi twile leswaku U kona le nambyeni. Ndzi landza Yena!" Oho, mina! Hiloko a famba!

<sup>122</sup> Hi awara liya ya ntshikelelo, a fanele ku teka xiboho: ku pfumelela n'wana wa yena a fa, kumbe a swi tiva leswaku sweswo a ku ri ku vonakarisiwa ka Rito. A ri muprista, nakona a hlayile Rito, kutani a swi tiva leswaku sweswo a ku ri ku tivonakarisa ka Xikwembu. Xikwembu a xi ri eka Kreste, ku vuyisela misava eka Xona n'winyi. A swi tiva sweswo, u sindzisile eka mhaka leyi. A fanele ku endla xihoxo, a pfumelela n'wana wa yena a fa, kumbe a tivula. Loko a khomiwa hi ntshikelelo walowo, a ku ri hi nkarhi lowu Yesu a nga fika hi wona. U yile a ya N'wi vona. A ku—A ku, "Ndzi ta famba na wena, swin'wana na swin'wana leswi u swi vulaka." Kutani hi le patwini, hiloko ku ta mutsutsumi, nchumu wo dzwihala kwalahaya. U tivurile, leswaku wa N'wi pfumela. U tihlongorile

hi yexe, na ku tiveka ematihlweni ya mani na mani, leswaku a ri mupfumeri wa Yesu.

<sup>123</sup> Kutani hiloko ku ta mutsutsumi, a ku, “U nga ha karhati munhu, hikuva xinhwenyetani xa wena se xi file. Xi file tolo. Se xi file. U nga, U nga ha tipoyili hi swona.”

<sup>124</sup> Kutani, oho, mbilu nyana ya yena yi lava ku tsandzeka. Kambe u langutisile kutani a vona matihlo lawaya ya Yesu, a ku, “Xana a ndzi ku byelanga? U nga chavi, loko u lava ku vona ku kwetsima ka Xikwembu. Xana u chava yini? Ndzi ku byerile leswaku Ndzi ta ya.”

<sup>125</sup> Se a vurile leswaku U ta ta. Se a vurile leswaku U ta endla leswi, nakona hi Loyi a swi endlaka. Amen. U vurile leswaku U ta pfuka eka mbono hi masiku ya makumu kutani a endla swilo leswi hilaha A nga swi endla hakona, tanahi laha hi nga hlaya hakona vusiku lebyi nga hundza na ku vulavula. Hi Loyi a nga eku swi endleni. Xana mi chava yini?

<sup>126</sup> Tsundzukani, loko A fika, nakona U xi vitanile eku feni. U fikile eka mbono kutani a n’wi vitana eku feni.

Mukhalabya Bartimiya wa bofu, nkarhi wun’wana, u bile awara ya yena yo dzwihala ku tlurisa.

<sup>127</sup> Yesu a ri kwalahaya, a kondleterile xifihlulo xa Full Gospel Business Men kona kwale—kwale Yeriko, nakona A ri na Zakeya kwalahaya. U hlanganile na yena ensinyeni, ku rhelela hi xitarata. Swingaleswi loko A ri . . . Kunene, A nga ta kondlete la nchumu wun’wanyana, ndza tshembha. Wa vona? Swingaleswi loko A fika kwalahaya, nakona A—A ri na yena, Zakeya a fambile na Yena.

<sup>128</sup> Mukhalabya Bartimiya wa bofu u vile bofu ku sukela loko a ha ri xifanyetana. Swingaleswi a ehleketa leswaku Yesu a nga huma hi nyangwa luwa, kutani a rindzerile. Endzhaku ka nkarhi u twile huwa leyikulu, na vanhu hinkwavo va ri eku teni.

<sup>129</sup> Kutani u twile muprista a ku, “Hey! Hey, wena, wena u yaka le xigangeni! Xana—xana—xana . . . Hi twa leswaku u pfuxa vafi. Hi na swilahlu hinkwaswo leswi swi nga tala hi vona le henhla. Loko u ri Mesiya, loko u ri Mesiya, tana haleni u ta pfuxa vafi lava.”

<sup>130</sup> Ma swi tiva, javulosi la fanaka wa ha hanya, wa vona, hi xivumbeko xa vukhongeri, hilaha ku fanaka. Wa vona?

<sup>131</sup> “Loko u ri Mesiya, hi . . . u pfuxa vafi; hi na swilahlu leswi swi nga tala hi vona le henhla. Tana.” Naswona, oho, un’wana na un’wana a ri karhi a kalakala. Un’wana a huwelela, “Hosana eka Muprofet!” Kutani un’wana a huwelela *leswi, sweswo, kumbe leswin’wana*. Mpfilumpfilu wo tani!

<sup>132</sup> Mukhalabya loyi wa bofu a ehleketa leswaku, “Oho, ndzi N’wi hupile. U humile hi le hansi halahaya, nakona a ndzi ehleketa leswaku U ta huma hi lahwani. Ndzi vekiwile

endhawini yo hoxeka.” Kutani a sungula ku kalakala. A ehleketa leswaku, “Loko ku ri ku hi Yena Rito, hi Yena Xikwembu; U fanele ku va tano.” Swingaleswi, “O Yesu, Wena N’wana Davhida, ndzi twele vusiwana!” Hi awara liya ya ntshikelelo, u huwelerile.

<sup>133</sup> Sweswi Yesu, loko mi nga swi fungha lahawani, a ri eYeriko. Laha va nge a tshamile kona, a ri kwalomu ka dzana na makume ntlhanu wa majorata ku suka laha Yesu a ri kona. Na magidi-gidi ya vanhu lava a va ri karhi va hundza-hundza ekusuhi na Yena. A nga ta va a swi twile ku huwelela ka wanuna luya. Ee. Kambe U swi twile. A yima.

<sup>134</sup> Ndzi lava ku chumayela, eka byin’wana bya vusiku lebyi: “Hiloko Yesu a yima.” Oho! “Hiloko Yesu a yima.” Oho!

<sup>135</sup> Kambe loko Yesu a yimile, xana a ku ri yini? U n’wi vitanile. “Hosi yi fikile. U nga vileli,” ku vula vadyondzisiwa, “Wa ku vitananeni. U le ku ku vitaneneni.” U n’wi vitanile ku suka eka ntshungu luwa.

U endla nchumu lowu fanaka na sweswi. Xana swa nwelela endzeni-ke? Wa vona?

<sup>136</sup> “Hosi yi fikile kutani ya ku vitana.” Nakona Yi vitana ku suka eka vubofu ku ya eku vonakaleni, ku suka emunyameni ku ya eku vonakaleni. U n’wi vitanile, ku hundza eku feni ku ya eVuton’wini. “Hosi yi fikile kutani Ya ku vitana.” Kutani loko Yi n’wi vitanile, Yi n’wi vuyiserile ku vona ka yena.

<sup>137</sup> Wansati lontsongo loyi a ri na xiphijo xa ngati, nkarhi wun’wana, le henhla ka xiganga, a tirhisile mali ya yena hinkwayo, eka madokodela. Yena, a swi kanakanisi, a va xavisile e—e ntlawa. A va xavisile e—e purasi, va ri lombisile. A va tirhisile hinkwaswo leswi a va ri na swona eka vatshunguri, ku ha va na un’we eka vona loyi a nga n’wi pfuna. U lo tshamela ku ya a nyanya. Ngati a yi nga yimi. Nkarhi na nkarhi, yi ya yi ri karhi yi ya emahlweni, u yile a ri karhi a mbombomela.

<sup>138</sup> Kutani siku rin’wana, loko a ha tshamile lahaya a ri karhi a rhunga, le henhla ka xiganga ku suka laha a tshama kona, u langutile ehansi ka nkova, kutani a vona byatso byi fika. Munhu un’wana na un’wana a sungula ku tsutsuma, “Hosana eka Muprofeta!”

<sup>139</sup> A twile hi ta Yena. Ripfumelo ri ta hi ku yingisa. Sweswi a ku, “Ndzi ta ya kwalahaya kutani ndzi ya N’wi vona.”

<sup>140</sup> Kute loko a yile kwalahaya, ivi a sungula a kuma xivono xa Rito ra Xikwembu xi vonakarisiwile enyameni, a ku ri na swin’wana hi mavulavulele ma Yena na hi malangutekele ma Yena, lero u swi tivile leswaku a ku ri Yena. Ina, nkulukumba. “Oho, loko ntsena ndzi nga koka rinoko ra Yena hi ndlela yin’wana, loko ntsena ndzi nga N’wi khumbha hi mukhuva

wun'wana!" Kutani a nyokovela hi le xikarhi ka ntshungu kutani a khumbha nguvu ya Yena.

<sup>141</sup> Sweswi tsundzukani, a ku nga ri rintiho ra wansati leri A nga ri twa. Ee, nkulukumba, hikuva nguvu ya le Palestina yi debyile. Nakona A...va r...

Petro u te, "Vanhu hinkwavo va Ku khumbhile."

<sup>142</sup> Yena a ku, "Kambe loku i ku khumbha loku ku hambaneke. Ndzi titwa Ndzi herile matimba."

<sup>143</sup> Yesu a fikile. Mali ya yena a yi herile, hinkwaswo a swi herile; kambe hi awara liya yo dzwihala loko ngati yi nga yimi, nakona madokodela ma nga koti ku yi yimisa, Yesu u tile. Nakona xana U endlile yini? U n'wi vitanile. A halahala hinkwako kukondza A n'wi kuma, kutani A ku, "A wuri na xiphiqo xa ngati, kambe yi yimile."

<sup>144</sup> "Hi la fanaka tolo, namunlha, na hi masiku." "Hosi yi fikile kutani Ya ku vitana. Yi fikile na swona Ya vitana." Yi n'wi vitanerile a tlhelela eka rihanyo.

<sup>145</sup> Wansati lontsongo le xihlobyen, loyi hi nga vulavula hi yena vusiku bya tolo, ntshembho hinkwawo a wu herile. Kumbexani, swi nga endleka leswaku nuna wakwe wa vuntlhanu a n'wi tshikile, kutani a lo titekela loyi wa vuntsevu hi vusiku byebyo, nakona a—a ri na ku kanakananyana hi mayelana na yena. Hi mahanye, a fambile. A lava ku va wansati wa xiviri; yena, handle ko kanakana, a ri karhi a hlaya Bibele.

<sup>146</sup> Kutani a ri karhi a ya kwalahaya, a ri karhi a tlhandluka hi kwalomu ka awara ya khume n'we. A nga ta ta ka ha ri mixo loko vavasati lavo lulama va ta. Kutani a va rhwala mati ya vona etinhlokweni ta vona, na mathini, ivi va tlhelela endzhaku. Swingaleswi a nga ta ta, a ta hlangana na vona. Vona, a va ri na xikhirhi xa sweswo hi nkarhi luwa, leswo lulama na leswo ka swi nga lulamanga a swi nga hlangani kun'we. Lava va mikhuva yo biha a va tshama endhawini ya vona, swingaleswi a nga ta ta na lavan'wana. A va nga ta n'wi pfumelela ku va a ta. Swingaleswi endzhaku ka loko un'wana na un'wana a hetile ku ka mati ya yena na ku tlhelela ekaya... U tele lawa yo Antswa.

<sup>147</sup> Kutani u tile kwalahaya a ri na thini leri enhlokweni ya yena, a swi kanakanisi leswaku a famba, a ri karhi a ehleketa, "Sweswi, wanuna loyi ndzi nga tekana na yena, kumbe, loyi ndzi nga n'wi kuma vusiku bya tolo, ndza n'wi sola. I wanuna, u tikhoma hi ndlela yo hlekisa. Ndzo—ndzo ka ndzi nga tivi nchumu hi yena. A ndzi na nkateko. Ndzi menuriwile etikweni. Nakona ndzi nga ka ndzi nga yi etikerekene letiya, a va... Ntsena ti langutisi! A ndzi swi tivi leswi ndzi nga swi endlaka. Ndzi le hansi ka ntshikelelo. Nakona a ndzi ri karhi ndzi hlaya Bibele; kunene, siku rin'wana, Muprofeta luya u ta fika eka mbono. Sweswi ndza swi tiva leswaku va koxile leswaku ku ha va nchumu wo tanahi walowo, nakona leswi swi tanahi, 'Kumbexani

ku hundzile dzana ra malembe, ku tlhela ku hundza gidi ra malembe. Hi swi languterile ku ringana magidi-gidi ya malembe, nakona a swi se humelela, swingaleswi a ha ha swi langutelanga sweswi.' Swilo hinkwaswo swi tanihi, 'Oho, ee, hi na tikereke na swilo. A hi lavi nchumu wo tanihi walowo sweswi.'" Swingaleswi a ri karhi a famba kwalahaya, a ri karhi a ehleketa.

<sup>148</sup> Ma swi tiva, loko mi ehleketa hi mayelana na Yena, hi kona laha A humelelaka eka n'wina. Tanihi leswi hi nga va na swona vusiku bya tolo, loko va ri endleleni ya vona yo ya e Emaus.

<sup>149</sup> Loko wansati a ha ehleketa hi swilo leswiya, u twile Munhu a ku, "Ndzi tisele mati yo nwa."

<sup>150</sup> Ku yini hi swona? Eka tiawara ta yena to dzwihala ku tlurisa, loko mahanyeleya ya yena ya fambile. Kumbexani a ku ri wansatinyana wo xonga, loyi a nga hundzuriwa exitarateni ku va a hanya kukotisa sweswo. Nkarhi wun'wana a hi nandzu wa nhwana lontsongo, i nandzu wa vatswari va yena, ku n'wi pfumelela a humela ehandle kukotisa sweswo. Kutani hi luya lahaya, kumbexani tikhele ta yena a ti ri karhi ti dewula; a hungutekile, a ri karhi a famba, a karhele, nakona a ku nga ri na loyi a lavaka nchumu hi yena, n'wana, kumbexani ku na xitori xi kulukumba endzhaku ka swona.

<sup>151</sup> Hambiswiritano, ndzi tiva nchumu wun'we, a tshame a hlaya Bibele, nakona a pfumela Bibele. Kutani a ku ri na mbewu leyintsongo leyi tshameke embilwini ya yena, yi nge, "Loko swo tshuka swi humelerile, ndzi ta swi tiva." A kunguhateriwile eka sweswo.

<sup>152</sup> Langutisani Yudasi luya wa khale loyi a yimile kwalahaya na ku tikhoma hi ndlela leyi a tikhomisa xiswona. A ku ntimile le hansi emakorhwени ya mibil ya yena. Rivoni a ri voninga ehenhla lahawani eka mintirho ya yena, kambe le hansi embilwini ya yena a nga Ri pfumeli. Kutani hi loyi wansati... Wa vona, Rivoni a ri nga ta fikelela le hansi eka sweswo. Kambe hi loyi wansati, ku pfumela, a Ri pfumela, kambe vutomi bya yena a byi dzwiharile; loko Rivoni ri tlhava, Ri susile munyama. Kambe loko Rivoni ri tlhava ehenhla lahawani, Ku dzwiharisile hinkwako. Sweswo hi swona ku hambana.

<sup>153</sup> Wa vona, a tswaleriwe xikongomelo xexo. Wansati—wansati u virile, loko A n'wi byela leswaku a ri na vavanuna vangani, a... Xana ku humelerile yini? Xikan'we-kan'we u kumekile a nyanyukile. U vile ehansi ka ntshikelelo. A ku, "Nkulukumba, ndza swi vona leswaku u Muprofeta. Ndza swi tiva leswaku loko Mesiya a ta, U ta endla swilo leswi."

<sup>154</sup> Kutani Yena a n'wi vitana. Kutani Yena a n'wi vitana. "Hi mina Loyi, Loyi a vulavulaka na wena." U swi lemukile hi Rito ra Xikwembu. Yena u n'wi vitanile ku suka eswidyoohweni swa yena, ku ya eVuton'wini. Kutani vito ra yena ri le Bibeleni, nakona u na Vutomi lebyi nga riki na ku fa namuntlha.

<sup>155</sup> A nga ha mi vitana hi ndlela leyi fanaka, hikuva Hi la fanaka tolo, namunlhha, na hi masiku. E...

<sup>156</sup> Ina, mahanyele ya yena a ya famble, kambe a tama a ha swi tiva leswaku Yena a ri na vuvonisisi byebyo. A swi tiva leswaku yaloye a fanele ku va a ri Mesiya. Kutani loko Yesu a ku, "Hi mina Loyi, Hi mina Loyi," u swi tivile leswaku a ku ri swona.

<sup>157</sup> Nkarhi wun'wana vadyondzisiwa a va ri le handle ebyatswini, ntshembho hinkwawo a wu herile. Swidzedze, va famble va nga ri na Yesu, nakona swidzedze ntsena—ntsena a swiri tanihi leswi a swiri hakona ekaya ka Lazaro. Ntshembho hinkwawo a wu herile. Byatsonyana lebyi bya khale a byi tele mati. Nakona a va ri karhi va kalakala na ku rila, nakona kumbexani a va ri karhi va khongela na ku ya emahlweni, na rihati ri ri karhi ri hatima, na byatso byi tele hi mati, timhandzi ta seyila ti werile ehansi, masonto ma tshoveka, nakona a va khomelelanile, va ri karhi va rila.

<sup>158</sup> Kutani hi awara yaleyo ya munyama lowukulu, kutani Yesu u tile a ri karhi a famba kwalahaya. Kambe A languteka tanihi ndzhuti eka vona. A languteka a chavisa, kukotisa xipuku, kutani va rilela ehandle hi ku chava.

<sup>159</sup> Sweswo hi leswi nga mhaka namunlhha. Yesu u ta eka awara ya n'wina ya munyama, nakona ma Swi chava. A mi swi tivi leswaku Swi yini.

<sup>160</sup> A va nga swi tivi leswaku A ri mani. Va te, "Oho, i xipuku!" A va ri karhi va kalakala.

<sup>161</sup> Kutani U va vitanile, a ku, "Mi nga chaveni, hi Mina." Eka awara ya munyama lowukulu, Yesu u tile, ku Pfuneka ka vona. Yaleyo i ndlela leyi A swi endlisaka xiswona minkarhi hinkwayo, ku ta hi awara ya munyama lowukulu. Kutani Yesu u tile a fika a tivonakarisa hi Yexe, kutani a ya ka vona.

Petro a ku, "Loko ku ri Wena, vula leswaku ndzi ta kwalaho ehenhla ka mati."

Yesu a ku, "Tana."

<sup>162</sup> Ma swi tiva leswaku i yini, vanghana? Ku nga ri khale U ta vuyela lava nga emasikwini lawa yo hetelela. Sweswi, xana a swi hlamarisi ku va kereke yi fikile eka awara leyi ya munyama nakambe?

<sup>163</sup> Ndzi ya eku vuleni ka swin'wana lahawani. A hi dyondzo ya kereke. Ntsena ndzo va eku profeteni. Ma swi tiva leswi nga humeleta? Swi ta ya eka xiylimi, ku nga ri khale, funghani marito ya mina, laha tidinominexini hinkwato ti nga ta boheka ku joyina Huvo ya Nhlangano wa tikereke. Loko ti nga swi endli, ti nga ka ti nga vi na wona nseketelo wa Huvo. Hikokwalaho, ku ta va na xikhirho, nakona ku ha va loyi a nga ta ya etikerekenei leti, kumbe ku ya ekerekenei yihi na yihi; handle ka loko u ri na mfungho ku suka ekerekenei ya wena n'winyi, u nga ka u nga xavi

kumbe ku xavisa. Ma swi vona hi ndlela leyi a swi ri xiswona, swi ta tlhela swi va tano nakambe, mfungho wa xivandzana. Kutani kereke, yi le ku lemukeni ka sweswo, vanhu va ximoya.

<sup>164</sup> Na n'wina vanhu va Xipentekosta, hambiswiritano, mi le ku swi lemukeni. Mi sungurile ku swi twa. Loko tikereke ta n'wina, yo tala ya mavandla ya Xipentekosta; nakona a ndzi boheki ku vula mavito ya n'wina, kambe ma swi tiva sweswi leswaku ti leti le ku teni eka swona. Va hetile ku mbhonyela leswaku a va ri tano. Kutani loko mi endla sweswo, xana mi ta fanela ku endla yini? Mi ta fanela ku lahlekeriwa hi madyondzisele ya n'wina ya Xiehangeli ya nkhuvulo wa Moya lowo Kwetsima. Mi ta fanela ku lahlekeriwa hi dyondzo ya n'wina ya Bibebe.

<sup>165</sup> Kutani swirho swi nge swi yimeli. Vakreste lava nga tswariwa ra vumbirhi hi xiviri va ta fa, ku sungula. Va lemukisiwa hi Rito. Va swi tiva leswaku nchumu lowu wu le ku teni. Ina, nkulukumba.

<sup>166</sup> Nakona xana a swi hlamarisi? Kutani kwala eka awara leyi ya munyama, kutani Yesu a humeleta ivi a va a hi vitana, a ku, "Mi nga chaveni. Hi Mina. Ndza ha ri na n'wina. Ndzi kona ku va Ndzi vonakarisa Rito ra Mina." Tanihi laha A ri xiswona khale, Wa ha ri tano na sweswi. U vurile leswaku U ta swi endla sweswo. Oho, mina! Hosi yi fikile kutani yi hi vitanile.

<sup>167</sup> Vanhu vo tala lava vabyaka lahawani, a swi kanakanisi, leswaku va tshamile kwala, naswona dokodela u mi byerile leswaku ku ha va—hava ntshembho eka n'wina. Mi nga ha va mi ri eka awara ya n'wina ya munyama lowukulu, kambe, tsundzukani, Hosi yi fikile kutani yi mi vitanile.

<sup>168</sup> Kutani siku rin'wana, siku rin'wana, Hosi yi ta ta yi ta vitana vito rin'wana na rin'wana leri nga tsariwa eBukwini ya Xinyimpfana ya Vutomi. Loko ku ri ku ma n'wina a ma kona kwalahaya, ma ngheniseni kwalahaya sweswi, hikuva Yi ta ta yi ta vitana. Hambi ku ri lava nga emasirheni va ta twa Rito ra Yona kutani va vuyela eVuton'wini. Hosi yi ta ta yi ta mi vitana. Kutani loko ya ha ri eku vitaneni namunlhla, pfumelani ivi mi lulamisela Siku rero, i xitsundzuxo xa mina eka n'wina.

<sup>169</sup> Xitshembhiso xa nguva leyi, Yi tshembhisile leswaku Yi ta va kona. Swilo leswi Yi nga swi endla, Yi ta tlhela yi swi endla nakambe, nakona sweswi Hosi yi fikile kutani ya mi vitana.

<sup>170</sup> A hi korhamiseni tinhloko ta hina. Ndzi na kwalomu ka ntsevu wa mapapila man'wana lahawani, kambe ndzi—ndzi nga ka ndzi nga ngheni eka wona sweswi. A hi korhamiseni tinhloko ta hina. Ndzi tshembhisile ku mi ntshuxa hi nkarhi, nakona se swi hundzile hi kotara.

<sup>171</sup> Tatana wa le Matilweni, O Hosi, pfumelela leswaku swi humeleta nakambe. Hinkwaswo swilo leswi ndzi nga swi vula, "Yesu u fikile nakona wa ku vitana." Xana U endla yini loko A fika? Wa vitana. Kutani swi pfumeleli swi humeleta nakambe,

Hosi. Pfumelela Moya wa Wena lowo Kwetsima wu ta exikarhi ka vanhu vusiku lebyi, Hosi Yesu hi xivumbeko xa—xa Moya. A te vusiku lebyi a ta tipaluxa hi Yexe, kutani a tivonakarisa hi Yexe. Kukotisa vanhu lavaya, hilaha a va pfumela hakona, hi ta pfumela, na hina, Hosi. Ku na vo tala lahawani, kumbexani, lava vo ka va nga se tshama va va na nkateko lowu. Ha khongela leswaku U ta va nyika wona nakambe vusiku lebyi. Hikuva hi swi kombela hikokwalaho ka ku kwetsima ka Xikwembu, hi Vito ra Yesu. Amen.

<sup>172</sup> Hi swona sweswo, sesi, kambe yana emahlweni na sweswo. Sweswo swi kahle. Yana emahlweni. Oho, a hi miyeleni, hinkwenu.

<sup>173</sup> Xana ma pfumela leswaku U fikile? U fikile. Xana Wa ha vitana loko A fikile? Sweswi ntsena loko mo pfumela. Ntsena loko mo pfumela Rito ra Xikwembu, Xikwembu xi ta mi nyika swona.

<sup>174</sup> Sweswi vonani, a ndzi na nkarhi wo vitana layini ya xikhongelo lahawani. Ndzi ta va vitana vusiku lebyi, kwalahaya, loko Hosi yi swi rhandza. Hosi yi fikile. Yi fikile ku va yi fikelerisa Rito ra Yona hi siku ro hetelela. Kutani leswi a Yi ri xiswona khale, Yi xiswona namunthla. Leswi vutivonakarisi kumbe vutitivisi bya Yona a byi ri xiswona khale, byi xiswona namunthla, hikuva Bya ha ri Rito ra Xikwembu. Xana ma swi pfumela sweswo? [Nhlengeletano yi ku, “Amen.”—Muhler.] Naswona Rito ra Xikwembu i Muvonisisi wa mianakanyo, makungu ya mbilu. Kutani ndlela leyi A nga swi endlisa xiswona khale, i ndlela leyi A nga swi endlisa xiswona nkarhi hinkwawo. Wa ha ri loyi a fanaka. Loko ntsena A nga tlhela a swi endla sweswi, xana mi ta N’wi pfumela-ke? Xana swi nga endla leswaku mi n’wi pfumela?

<sup>175</sup> N’wina vanhu lava nga ehandle sweswi, mi nge ndzi sungula ndzi langutisa loko ku ri ku ku na munhu loyi ndzi n’wi tivaka, a tshameke kun’wana kwala, loyi ndzi n’wi tivaka.

<sup>176</sup> Hinkwavo lava va nga kona, ehenhla *lahawani*, lava va nga ndzi tiviki, yimisani mavoko ya n’wina; ma swi tiva leswaku a ndzi tivi nchumu hi n’wina, naswona ma vabya, yimisani mavoko ya n’wina. Ndzi tshembha leswaku, i munhu un’wana na un’wana. Swi lulamile, sweswi, mi pfumela. Pfumelani ntsena hi timbilu ta n’wina hinkwato. Mi nga kanakani. Mi va na ripfumelo. Mi pfumela Xikwembu.

<sup>177</sup> Ndzi ta kombela leswaku mi miyela swinene, mi tshamiseka. Mi nga yi hala na hala sweswi, ndza kombela leswaku mi nga swi endli. Wa vona? Wa vona? Hi wena e—e moyo-xiviri, miri, na moyo. Kutani moyo wa wena... Nakona Moya lowo Kwetsima wu rhombile hakunene.

<sup>178</sup> Xana i vangani lava va tsundzukaka, malembe yo tala lawa ya nga hundza, leswaku Moya lowo Kwetsima, loko ndzi ta

lahawani ndzi ta mi byela? Loko ndzi teka vanhu hi voko, Wu ndzi byerile leswaku vuvonisisi lebyi byi ta ta, kutani byi hundzela emahlweni? Ma swi tsundzuka, ku tsundzuka sweswo? Kambe Wu te, “Loko wo endla leswaku vanhu va ku pfumela.” Ma ya tsundzuka masiku lawaya, malembe yo tala lawa ya nga hundza? [Nhleengeletano yi ku, “Amen.”—Muhleri.] Mi fanele ku pfumela.

<sup>179</sup> Ndzi vonile wanuna, ndzi pfumela leswaku a ku ri kona kwala eka nhleengeletano leyin’wana, a tshamile lahaya. Kutani Moya lowo Kwetsima . . . A ndzi n’wi langutile loko ndzi ri karhi ndzi chumayela. A ri wanuna loyi a lamaleke. A manile tinhonga ehansi ka makhehele ya yena. Kuteloko ndzi sungula ku vitana, Sathana a ta eka wanuna, ndzhuti wa ntima. Kutani ndzi wu langutile hi matihlo ya mina n’winyi. U tlakukile a huma a famba. U ta tshama a lamarile, wa vona. Swingaleswi, yena, laha a ta va a horisiwile kwalahaya loko ntse—ntsena . . . Wa vona? Kambe, ntsena, a ndzi swi tivi leswaku hikokwalaho ka yini. Ndzi tshembha leswaku u yingisile nala. Kambe loko mo yima ivi mi langutisa mindzhuti yaleyo, mi vona swilo leswiya hi swivumbeko, hi ndlela leyi swi nga xiswona, kutani mi vona hilaha swi endlaka hakona. Wa vona, a swi ta va . . .

<sup>180</sup> Sweswi, a ndzi swi koti ku horisa. Munhu loyi a mi byelaka leswaku a nga mi horisa, wa hoxisa. I khale mi horisiwile. Kambe, i ku lemuka Vukona bya Yesu Kreste. Sweswi loko Marta a swi tivile leswaku loko o tlhela a N’wi vona nakambe, a ta kuma ku navela ka yena, hikuva A ri Rito leri vonakarisiweke, xana hina hi nga ka hi nga pfumeli swonghasi vusiku lebyi, ku swi pfumela? Hakunene, hi fanele ku endla tano. U fikile. U fikile, U fikile hi xivumbeko xa Moya lowo Kwetsima. Sweswo hi leswi A nga xiswona. Sweswi ntsena khongelani.

<sup>181</sup> Wa wona, ehenhla lahawani, loko a ndzi ri na un’wana a yimile lahawani, kona kwala na mina, ntsena—ntsena hi ri karhi hi khongela; ma vona, ndzi vonile vanhu vo tala va ri karhi va khongela, swi le ka muako hinkwawo. Ntsena mi fanele ku swi langutisa. Mi nga ka mi nga vuli leswaku, “A hi nge, Makwerhu Branham . . .” Ee, nkulukumba. A ndzi—ndzi nga ta swi endla, ku nga ri ku tlula ku va u ndzi lorhela norho. Wa vona? U nga ha lorha. Wena, Xikwembu xi nga endla leswaku u lorha norho wa mina, wa swi pfumela sweswo, kambe u nga ka u nga swi endli hi wexe. U nga ka u nga vuli, leswaku, “Makwerhu Branham, ndzi ya eku lorheni ka norho wa wena sweswi.” Ee, u nga ka u nga swi endli sweswo. Na hambi ku ri ku va mina ndzi vona xivono. Hambi ku nga va mani loyi a ku nyikaka norho, hi yena loyi a faneleka ku swi endla. Ka ha ri ndlela yin’we na le ka xivono.

<sup>182</sup> Ndzi vona wanuna loyi a tshameke lahawani emakumu ka rheyi, u na vuvabyi bya mahlangano ya marhambo. Loko a nga pfumela hi mbilu ya yena hinkwayo, Xikwembu xi ta n’wi horisa eka vuvabyi bya mahlangano ya marhambo. Xana wa pfumela

leswaku Xi ta swi endla, nkulukumba? U tshamile kwalahaya, wanuna wa Mumexico, loyi a tshameke emakumu ka rheyi, xana u ta swi pfumela? Swilulamile, nkulukumba.

<sup>183</sup> Manana loyi a nga tshama ekusuhi na wena, na yena u na vuvabyi bya mahlangano ya marhambo, na yena. Xana wa pfumela leswaku Xikwembu xi ta ku horisa, manana? (Xana *lexi* xi nga va xi ri na ngulumelo eka xona? Ndzi ni ku chava leswaku vanhu a va le ku swi tweni.) U ta swi endla? Swi lulamile.

<sup>184</sup> Swi nga va njhani hi wansati loyi un'wana wa Mumexico loyi a nga tshama na yena? Na yena u xaniseka hi ku karhateka ka le khwirini. Xana wa pfumela leswaku Xikwembu xi ta horisa khwiri ra wena, manana?

<sup>185</sup> U swi kumile. Loko ndzi vona Rivoni leriya ri rhelela ehansi, sweswo swi vula leswaku swi endlekile. Ina. Hi sweswo. Ri n'wi bile. A Ri ri kwalahaya, ri ri karhi ri ndzuwuluka kwalahaya... [Xivati *lexi* nga riki na nchumu eka thepi—Muhleri.]... sweswo swa swi endla. Wa vona? Loko Xi nga kuma ripfumelo! Wa vona, “Swilo swo tala A nga ta swi endla hikwalaho ka leswi va nga pfumelangiki.”

<sup>186</sup> Hi loyi wansati a nga tshama lahawani a ri karhi a khongela, kona kwala. U tshukile. Wa fanela ku va tano. U na xiyimo xa mfukuzani, yo chavisa. A ndzi ku tivi, kambe Xikwembu xa ku tiva. Xana wa pfumela leswaku Xikwembu xi nga ndzi byela hi mayelana na mfukuzani leyи, kumbe swin'wanyana? Ndzi langutisi. Ku na vo tala lava nga eku khongeleni, ma swi vona, hi leswi ndzi swi vulelaka swona. Hi langutisi. Sweswi, ina, a wu wa laha, leri a hi kaya ra wena. U huma endhawini leyи vuriwaka Porterville, California. Hi swona sweswo. Xana wa pfumela leswaku Xikwembu xi nga ndzi byela leswaku hi wena mani? Xa swi tiva. Vito ra wena i Manana Wintham. Hi swona sweswo. Sweswi pfumela, kutani mfukuzani yi ta ku sukela. “Loko wo pfumela.” Hi sweswo ntsena leswi Xikwembu xi ku kombelaka ku swi endla. “Loko wo pfumela.”

<sup>187</sup> Xana a mi swi pfumeli sweswo hi timbilu ta n'wina hinkwato? Munhu un'wana eka xiphemu *lexi lahawani*, xana a wu pfumeli? Hosi yi fikile nakona ya ku vitana. Yi le ku ku vitaneni ku suka eku feni ku ya eVuton'wini, ku suka evuvabyini ku ya eka rihanyo.

<sup>188</sup> Hi loyi wanuna loyi a nga tshama endzhaku lahawani, u korhamisile nhloko, u le ku khongeleni. Ntsena a ngo khongeleta yena n'winyi, u khongela hikokwalaho ka munhu un'wana. I e—e nhwenyana. I n'wana wa yena. Xana wa pfumela, nkulukumba? U karhatiwa hi milenge ya wena. U karhatiwa hi tsolo ra wena. Hi swona sweswo. A swa ha lavi ku humesa mihloti, hi Yena loyi a nga na wena kwalano. N'wana wa wena u le xibedlele, a nga kona xana? Xiyimo xa rifuva. Wena Pfumela. Wa pfumela? Hosi yi fikile kutani ya n'wi vitana. Xana u ta pfumela, tanahi tata wa

yena? U ta swi endla? Ingaku Yi nga n'wi endzela vusiku lebyi, na wena. Ingaku swi nga hela.

<sup>189</sup> Hi lexi xifanyetana, xifanyetana xa xikandza xa buraweni. Xi xanisiwa hi vuvabyi bya nhlonge, na vuvabyi bya phika, xifanyetana xa Mumexico, xifanyetana xa Mumexico lexi nga tshama lahaya. A xi humi lahawani. Xi huma eSan Jose. Xana wa pfumela, jaha ra mina? Nchumu wun'wana, tata wa wena u na wena kwala. Hi yena muministara. Hi swona sweswo. Xana wa pfumela leswaku Xikwembu xi nga ndzi byela leswaku vito ra wena i mani? Xana swi nga endla leswaku u tiya swinene? Vito ra wena i Reuben. Sweswi pfumela. Ahaa. Xikwembu xi ta ku horisa.

<sup>190</sup> Hosi yi fikile kutani ya ku vitana. Oho, mudyohi, oh, muvabyi, xana a wu yi voni Hosi yi vonakarisiwile eka vanhu, exikarhi ka vapfumeri? Yi tile ku ta vitanelu vana va Yona lava pfumelaka eku hanyeni. Yi tile ku ta vitanelu mudyohi eku hundzukeni. Loyi a nga wa, xirho xa kereke, Hosi yi fikile kutani ya ku vitana.

<sup>191</sup> Xana ma swi pfumela? Xana ma swi pfumela eka swilaveko swa n'wina sweswi? Loko mi pfumela, yimisani mavoko ya n'wina, mi ku, "Ndza pfumela hikokwalaho ka xilaveko xa mina." Kutani yimani hi milenge ya n'wina ivi mi swi amukela. Hosi yi fikile kutani ya mi vitana. Kutani hambi u nga va u ri mani, hambi u nga va u lava yini, Hosi yi fikile kutani Ya ku vitana. Hi la fanaka tolo, namuntlha, na hi masiku.

<sup>192</sup> Wansati lontsongo u yile edorobeni, kutani a ku, "Tanani, mi ta vona Wanuna Loyi a nga ndzi byela leswi a swi hoxekile." A mi yanga edorobeni. Mi tile mi ta swi vona, hi n'wexe, swingaleswi Hosi yi fikile kutani ya mi vitana.

<sup>193</sup> Yimisani mavoko ya n'wina kutani mi Yi dzunisa, mi ku, "Hosi Yesu, ndzi mudyohi; ndzi rivaleli. Ndzi loyi a nga wa; ndzi amukele, Hosi. Ndzi lava Moya lowo Kwetsima; ndzi tate. Ndza vabya; ndzi horise. Ndzi lamarile; ndzi endla ndzi va kahle." Hosi yi fikile kutani ya ku vitana. Yimisani mavoko ya n'wina sweswi kutani mi Yi dzunisa. Amen.

<sup>194</sup> (Hi chayeli swintsongo lahawani, "Ndzi ta N'wi dzunisa, Ndzi ta N'wi dzunisa." Wa ri tiva? *Ndzi Ta N'wi Dzunisa*. Wa ri tiva rero, a hi swona?)

Xana ma pfumela?

Ndzi ta N'wi dzunisa, ndzi ta N'wi dzunisa,  
Oho, dzunisani Xinyimpfana lexi nga  
tlhaveriwa vadyohi;  
N'wi nyikeni ku kwetsima, n'wina vanhu  
hinkwenu,  
Hikuva Ngati ya Yena yi hlantswile xipatso  
xin'wana na xin'wana.

<sup>195</sup> Ma N'wi rhandza? Sweswi xana a mi swi rhandzi ku N'wi yimbelelela loko A ha ri kwala? Hi yena Moya lowu fambaka ku rhendzeleka hi muako. U tiva timbilu ta n'wina, u tiva hinkwaswo mayelana na n'wina. A hi N'wi yimbeleleni, hi timbilu ta hina hinkwato.

Ndzi ta N'wi dzunisa, (yimisani mavoko ya n'wina loko mi swi endla), Ndzi... (sweswi ntsena N'wi dzuniseni)... N'wi dzuniseni,  
 Oho, dzunisani Xinyimpfana lexi nga tlhaveriwa vadyohi;  
 Oho, N'wi nyikeni ku kwetsima, n'wina vanhu hinkwenu,  
 Hikuva Ngati ya Yena yi hlantswile xipatso xin'wana na xin'wana.

<sup>196</sup> Oho, wansati, wena u nga exitulwini xa mavhilwa, loko ntsena u nga pfumelanyana swintsongo kwalano. "Ndzi..." A hi ri ringeten'i nakambe. Ndzi yimele swin'wana.

Ndzi ta N'wi dzunisa, ndzi ta N'wi dzunisa,  
 Oho, dzunisani Xinyimpfana lexi nga tlhaveriwa vadyohi;  
 N'wi nyikeni ku kwetsima, n'wina vanhu hinkwenu,  
 Hikuva Ngati ya Yena yi hlantswile xipatso xin'wana na xin'wana.

<sup>197</sup> Sweswi loko hi ri karhi hi yimbelela rero nakambe, hundzuluka, u khoma voko ra munhu un'wana, loko hi ri karhi hi ri yimbelela, yimbelelani, "Ndzi ta N'wi dzunisa." A hi yeni, hinkwerhu kun'we sweswi.

Ndzi ta N'wi dzunisa, ndzi ta N'wi dzunisa,  
 Dzunisani Xinyimpfana lexi nga dlayeriwa vadyohi;  
 N'wi nyikeni ku kwetsima, n'wina vanhu hinkwenu,  
 Hikuva Ngati ya Yena yi hlantswile xipatso xin'wana na xin'wana.

<sup>198</sup> Oho, munghana wa mudyohi, xana a wu nge ti lahawani sweswi? Tanani haleno mi ta N'wi dzunisa, n'wina vanhu hinkwenu. Hinkwenu n'wina vanhu lava va lavaka ku N'wi hlambanya ku va a ri Muponisi. Evukonen'i bya Yena, loko vakwetsimi va ha gandzela va ri Emoyeni, xana a mi nge ti lahawani mi ta yima? Mi ku, "Ndzi lava ku nyika vumbhoni, vusiku lebyi. Ndzi lava ku N'wi dzunisa. Ndzi lava ku ta. A ndzi khomiwi hi tingana hikwalaho ka Yena. Ndzi lava leswaku misava yi swi tiva leswaku ndza N'wi amukela tanihu Muponisi wa mina, kona kwala loko A ha ri kona." Tanani loko ha ha ri yimbelela.

Ndzi ta N'wi dzunisa, (xana a mi nge ti?) ndzi ta N'wi dzunisa,  
 Oho, dzunisani Xinyimpfana lexi nga tlhaveriwa vadyohi;  
 Oho, N'wi nyikeni ku kwetsima, n'wina vanhu hinkwenu,  
 Hikuva Ngati ya Yena yi hlantswile xipatso xin'wana na xin'wana.

<sup>199</sup> Oho, hi sweswo, wansati, tana haleno. I mani un'wana a nga ta ta, eVukoneni bya Kreste? Tana kona kwala, sesi, yima kwala.

<sup>200</sup> Munhu un'wana loyi a lavaka leswaku Yena a va Muponisi wa yena, sweswi, loyi a nga riki na tingana. U te, “Loko u ri na tingana hikokwalaho ka Mina emahlweni ka vanhu, Ndzi ta khomowihi tingana hikokwalaho ka wena emahlweni ka Tatana wa Mina na tintsumi leto kwetsima.” Loko mi nga ri na tingana hikokwalaho ka Yena sweswi, kutani mi lava leswaku A va Muponisi wa n'wina, loko A ha ri kona! Mi n'wi vonile. Ri hetisekile swonghasi, Rito hi Roxe ri titivisile Rona n'winyi. Tanani haleno loko vakwetsimi va ha ri eku dzuniseni sweswi. Xana a mi nge ti-ke?

<sup>201</sup> Xikwembu xi ku katekisa, nkulukumba. Hi loyi mukhegula a taka, u kongomile malembe ya xiviri. Xana a mi nge ti sweswi?

Ndzi ta... (ri yimbeleleni sweswi)... ndzi ta dzunisa...

<sup>202</sup> Hi swona sweswo, n'wina lavantsongo, tanani mi ta rhendzeleka kwala. Ntsena mi dzunisa. Xikwembu xi ku katekisa, manana, i ndlela yo swi endla hakona yaleyo. Xikwembu xi mi katekisa, n'wina lavantsongo.

...dlayeriwa vadyohi;  
 N'wi nyikeni ku kwetsima, n'wina vanhu hinkwenu,  
 Hikuva Ngati ya Yena yi hlantswile xipatso xin'wana na xin'wana.

<sup>203</sup> Loko tiministara ta haya eka vanhu lava sweswi xana a ku na un'wana loyi a nga taka? Loyer a nga wa, xana u nga ta, u ta ku, “Ndzi na tingana hi vutomi bya mina”? Hi Loyer kwala. Xana ma pfumela leswaku ndzi nandza wa Xikwembu? Yimisami mavoko ya n'wina. Hikokwalaho ka yini, Yesu Kreste u le xikarhi ka hina. Xana a mi nge ti-ke?

N'wi nyikeni ku kwetsima... (Xana a mi nge ti, mi ta N'wi nyika ku kwetsima?)... vanhu, Hikuva Ngati ya Yena yi hlantswile...

<sup>204</sup> Marta, xana u le ku teni, kumbe u ta ya u ya tshama endlwini na Mariya? Xana u ta ya u ya tshama endzhaku eka vandla ro karhi, kutani u ku, “Oho, kereke ya mina a yi Ri pfumeli hi ndlela leyi,” loko Kreste a vonakarisiwile? Xana u ta tshama

kwalano kutani u vula sweswo, kumbe xana u le ku humeni? “Kunene, ndzi ta ku byela, loko ndzi . . .” Ee. Namuntlha, hi yona awara leyi. Rifu ri lenga-lenga etlhelo ka wena, kukotisa n’wana wa Yairo.

<sup>205</sup> Tana sweswi! Wena la nga wa, tana sweswi. Wena mudyohi, tana sweswi. Lowu hi wona nkarhi. Hosi yi fikile kutani Ya ku vitana. Yi le ku ku vitaneni. U ri, “Ndzi swi tivisa ku yini?” Yi le ku tirhiseni ka rito ra mina. Loko Yi tirhisa rito ra mina ku byela vuvabyi, ku vaviseka na swin’wana, xana a wu swi tivi leswaku Yi vitana na byona vudyoho? Huma! Tana sweswi, lowu wu nga va wuri nkateko wo hetelela lowu u nga vaka na wona.

<sup>206</sup> Kan’we ntsena, ku na vo tala lahayani lava a va fanele va ta, vanghana. A ndzi lavi ku mi xumbadza, hi ku mi vitanisa xileswi. Sweswo a swi kahle. Loko nkarhi wun’wana kumbexana mo . . . Vafarisi a va ehleketa leswaku va ponisiwile, kambe a va nga ponisiwanga. Mi le ku ehleketeni ka nchumu lowu fanaka. Tanani sweswi.

<sup>207</sup> Vanani na ntiyiso! Mi nga, mi nga teki ntsena mpfhuka wa le xikarhi eka swona. Loko ku ri na ku kanakananya emiehleketweni ya n’wina, mi nga ringeti. Tanani sweswi. Lowu hi wona nkarhi, sweswi loko Xihlovo hinkwaxo xa ha pfulekile, loko Moya lowo Kwetsima wa ha ri kona. Hosi yi fikile. Ku kanakana kwaloko lokuntsongo, hi kona loku Yi ringetaka ku mi byela, “U le ku kanakaneni.” Ku cukumeteni. Tanani, sweswi. Hosi yi fikile kutani ya mi vitana. Hi swona sweswo, ntsena yanani emahlweni mi ta, yanani emahlweni mi ta.

Ndzi ta N’wi dzunisa, ndzi ta N’wi dzunisa,  
(Xana a mi nge ti mi ta N’wi dzunisa?)

Dzunisani Xinyimpfana lexi nga tlhaveriwa  
vadyohi;

N’wi nyikeni ku kwetsima, n’wina vanhu  
hinkwenu,

Hikuva Ngati ya Yena yi hlantswile xipatso  
xin’wana na xin’wana.

<sup>208</sup> Sweswi loko vadyohi va ha ri eku teni, ku ta N’wi koxa; vanhu a va N’wi dzunise, loko hi ri karhi hi ri yimbelela sweswi. Mi tlakusile mavoko ya n’wina, mi yimbelela ku N’wi dzunisa, sweswi, hinkwenu kun’we.

Ndzi ta N’wi dzunisa, ndzi ta N’wi dzunisa,  
Dzunisani Xinyimpfana lexi nga tlhaveriwa  
vadyohi!

<sup>209</sup> Ntsena N’wi dzuniseni! N’wina vanhu lava nga kona lahayani, khongelani, mi kombela leswaku A mi rivalela. Sweswo hi leswi A nga ta swi endla. Hosi yi fikile kutani ya mi vitana. Xikwembu xi mi katekisa.



*KUTANI YESU U TILE A FIKA A VITANA* TSO64-0213  
(Then Jesus Came And Called)

Hungu leri hi Makwerhu William Marrion Branham, ri sungurile ri hangalasiwa hi Xinghezi hi Ravumune ni madyambu, Nyenyenyan 13, 1964, e Elliott Auditorium eTulare, California, U.S.A., ri tekiwile kusuka eka nkandziyiso wa thepi ya maginetiki kutani yi tsariwa yi nga khomananga hi Xinghezi. Hundzuluxo lowu wa Xitsonga wu tsariwile wu hangalasiwa hi Voice Of God Recordings.

XITSONGA

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Xitiviso Xa Mpumelelo Wo Kopa

Timfanelo hinkwato ti hlayisiwile. Buku leyi yi nga ha kandziyisiwa hi printara yale kaya leswaku munhu a ti tirhisela kumbe ku yi phakela, yi nga hakerisiwi, tani hi xitirhi xo hangalasa Evhangeli ya Yesu Kreste. Buku leyi a yi xavisiwi, yi humesiwa hi xikalo lexikulu, yi vekeriwa eka “website,” yi hlayisiwa eka tisisiteme leti ti nga swi kotaka kuva yi tekiwa, yi hundzuluxeriwa eka tindzimi tin’wana, kumbe yi tirhiseriwela eka nkwama lowu wu nga pfumeleriwa handle ka nhlamuselo leyi yi nga tsariwa ya ku pfumeleriwa hi Voice Of God Recordings®.

Vuxokoxoko byo tala kumbe nhundzu yin’wana leyi yi nga kona, mi komberiwa ku ti hlanganisa na:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)